





蘧石齋文集卷第十三

秀水錢載坤一

跋一

顧氏譜像合卷跋

珍山顧先生示

載

顧氏譜像合卷譜則自漢東海王搖十六

傳而為吳醴陵侯雍於史始有傳醴陵十二傳而為陳祕書

監野王祕書子五人盛南鴻南周南夏南允南允南仕隋封

征西侯征西之元孫為唐宏文著作郎況著作十一傳而為

宋大理寺卿明命號西嶺自東海至大理四十五世其兄弟

之別出皆可攷宋元名人題贊尚有存者王梅溪顧氏家傳

後序謂一卷龍圖閣學士臨所藏一卷大理卿明命所藏一

卷資政殿學士其行所藏按大理臨從子其行於大理同祖



而此卷則錄自大理之所藏者也先生祖爲  
本朝廣東學使勉齋先生學使考封興化守廷樞興化考鄉  
飲賓道潔鄉飲考鴻臚丞起孝鴻臚考副使可久是爲洞陽  
先生明毅肅兩朝以忠諫兩被廷杖者洞陽先生考封泉州  
守榮章祖大宗伯信曾祖贈宮保壽高祖義士福五義士考  
澤州僉判潤之僉判之高祖卽宋大理西嶺蓋大理又十五  
傳而至先生云像則吳醴陵侯陳祕書監唐冢宰少連宋龍  
圖閣學士暨大理卿而學使得此卷後增入洞陽先生意舊  
所遺像不止是幸大理像猶存則由洞陽以溯大理以溯醴  
陵且東海爲越王句踐七世孫實大禹之苗裔則夫一綫相  
承世德縣延有若江東顧氏者良亦罕已謹爲序次之以復  
于先生以告其後賢之寶此卷者

題汪退谷瘞鶴銘考彙後

瘞鶴銘旣辨其非逸少逋翁書然考第二行華陽眞逸譔上  
皇山樵書則亦不得謂書者貞白也北固有米老題字云仲  
宣法芝米芾元祐辛未孟夏觀山樵書斯爲得之太上黃庭  
內景經徽宗題爲羲之書至松雪直曰爲楊羲亦屬之餐霞  
服炁之人今年始獲見其蹟夫眞蹟與石刻之僅存者惟貴  
乎師法之又何必鑿求其姓氏爲邪康熙壬辰陳使君出銘  
石於江岸甲午六月退谷爲作考此其初彙付萼兒藏者自  
跋云集錄三日而畢酷暑揮汗雨淋不顧也今乃爲蔗畦所  
購從此爲世間之寶矣余嘗得姜西溟湛園詩彙墨蹟凡四  
帙因念文詞書畫之傳不必盡藏於其家之子孫而其傳爲  
更遠西溟之擅書名前於退谷其事又適相類者他日亦當



裝冊與蔗畦共賞焉乾隆庚寅十月二十七日

跋羅旭莊自送出守德安序

羅旭莊前輩將出守德安自作序以自送其行此古人所未嘗有者同朝多著作家先生不之乞而乃煩先生之自言乎夫學道之微非其自知之則亦不能自言之顧卽自言之猶不能自行之也況于涖德安而隨時以宜民者先生其能一豫自言之乎然則古人之贈人以言固不若其人之自言或者其容有一當也乎庚寅十一月十七日跋

戴嵩牛跋

唐韓晉公五牛圖已入內府寶藏載嘗見吾郡項聖謨臨本而錄得趙文敏之跋此幅戴嵩所畫適購于虎坊橋肆晉公之鎮浙右嵩爲巡官一云爲幕客實師晉公畫牛諦觀此

蹟正不知於後來厲歸真裴文暉爲何如特愛別幅自題四言疎峭古質且其書尤絕佳執筆運腕乃先得乎林韞陸希聲南唐後主所屢經拈出衛夫人以來法如撥鐙者巡官若此而晉公更何可遇諸想像閒邪米南宮云世俗見牛卽命爲韓滉戴嵩甚可笑此之命爲戴不可笑也

題趙文敏摹李將軍明皇幸蜀圖

夏邑彭六一中允購得此幅以見贈款云大德十一年秋七月廿又三日吳興趙孟頫摹李將軍明皇幸蜀圖於松雪齋絹破色暗遽以付裝潢人而首行前十數字已爲所脫落矣南宋趙與勳藏有李昭道摘瓜圖宣和畫譜李思訓無幸蜀圖李昭道有摘瓜圖而石林避暑錄云明皇幸蜀圖李思訓畫藏汝南郡王仲忽家嘗見其摹本方廣不盈二尺明皇作



騎馬相前後導從略備道旁瓜圃宮女有卽圃摘瓜者或諱之爲摘瓜圖蓋明皇之幸蜀六月也故圖幸蜀者圖摘瓜後人謂諱之矣而思訓之與昭道蓋莫之辨東坡先生亦云唐人謂諱之矣而思訓之與昭道蓋莫之辨東坡先生亦云唐李將軍思訓作明皇摘瓜圖嘉陵山川帝乘赤驃起三駿與諸王及嬪御十數騎出飛仙嶺下初見平陸馬皆若驚而帝馬見小橋作徘徊不進狀今松雪齋所摹正與之合妮古錄云文敏家藏小李將軍摘瓜圖嘗倩胡廷暉全補然則文敏此幅固摹其所藏之昭道摘瓜而仍從後人語題作明皇幸蜀也筆法古秀設色蒼潤嘉陵山川何止渺然有數百里之勢邪可不寶諸

鈔元蘇宏道書延祐甲寅科江西鄉試石鼓賦李丙奎徐汝士王與玉陳祖義李路羅曾吳奔凱及

### 宏道八篇卷跋

自有進士科以來元仁宗始定制鄉試會試第一場以論語大學中庸孟子發題用朱子集注章句訓義第二場亦試賦右卷石鼓賦八首延祐甲寅第一科鄉試江西第二場試卷之作也蘇君旣爲其同舉七人者書之復以己作殿之試卷之最初而僅傳於世所見蓋不能有二況墨蹟乎載借得此卷壬辰九月廿八日恭屆孟冬朔

太廟時享齋宿詹事府遂依式鈔之幼不學書生疎謬戾筆畫雜出乃不中與延祐甲寅江西諸君作謄錄生可媿哉時年六十有五

### 塞上同徵小集卷跋

乾隆乙未五月



上幸避暑山莊載蒙

恩扈從時同扈從而有同徵誼者少宰曹地山副憲申笏山蓋同徵之官京師者邇年惟是三人矣今又同來塞上於是治具邀集已而復集又集情文周洽俱各有詩載為兩公作畫卷又自作一卷相約各書其詩於卷中載詩不足存何況於畫其所存者存兩公之詩也且以回復四十年前同徵諸公之意也倡歎之餘能無感焉七月廿九日跋

又

載既就前卷閱日請 皇子觀之為題云乾隆元年丙辰

御試天下所舉博學宏詞於 保和殿取十五人二年又試取四人我

皇上述康熙己未

召試之事繼雍正癸丑

三詔之志將以見天下才也丙辰科劉文定公擢舉第一同徵者陳句山先生曾入直 上書房錢坤一先生又於今歲九月入直 上書房而以是卷見示余讀先生詩蓋深感

聖明之遇垂惜暮成亦以撫北上初心河干在目而因及友朋時會往復肫然猶夫古誼也足以傳矣然 國家盛舉宜

備列同徵姓氏為識不忘使後有所考乙未十一月廿三日皇十一子書於是載備錄同徵二百六十七人姓氏爵里又

跋之云 皇子一言之重而是卷且可作公車小錄觀丙辰同然則麗正門山莊正西山齋之集正有期也嘉平廿四日載詩

錄有昨者蒙 恩召見惜載之遲中進士載奏及被薦 御試之歲又丙辰應 詔北先大夫送之河干先夫人送之中堂目載出門所以 皇子跋發明其事

王文成詩董蘿石像卷跋

奉石齋文集卷十二

五



靜志居詩話所敘董蘿石從陽明先生事卽此卷先生書於稽山草堂之詩是也蘿石像當是其後人因詩而裝入以傳於家者久而失之今乃歸仰山陳孝廉攜以上公車遂來見示憶辛酉冬嘗拜蘿石之墓於羅漢灣閱四十年始見其像并獲觀陽明之詩與書紙絹幅尙皆完好孝廉以鄉里先賢敬爲什襲此卷亦可謂天地閒物也載先塋在永安湖北先太常與許雲村先生爲親家雲村亦從陽明游其居茶磨山去羅漢灣十數里孝廉家澈城載前年奉命西江製短筇一徧攬廬山之勝去年奉命秦蜀登華山青柯坪登吳嶽歷褒谷入劔門謁漢惠陵回道復奉命江南登鍾山攝山短筇蓋行二萬六千里矣他日攜之歸澈上與孝廉俱重尋許宅董墳低回於長松巨石之間希風曩哲詩云高山仰止

載雖老豈敢自後乾隆辛丑二月應孝廉屬書詩話於宣南坊卽卽以識



揮石齋文集卷第十四

跋二

秀水錢載坤一

黃石齋先生畫松石卷跋

水墨松株十八葉法凡五簡筆皴斷厓一帶石之立者三而松則抱之倚之臥之又叢立於其顛自題報國寺後庭二高前庭二偃西山竇柏外無踰此應天南郊壇二林屋洞前一黃山之最著者曰卷龍曰破石曰自在松大段磊落當亦勃發其平生之所見耳嗚呼先生松也先生石也然則非松非石者烏可以題其所畫載嘗藏有倪文貞公山水樹石冊皆自題之其一云石介已極木淡無過世間藤蘚將若之何蓋君子之守道而特立也藤蘚既無由攀附且擴然而憫其終



窮杜公詩十月清霜重飄零何處歸亦安忍有所薄於螢哉  
覆觀先生之於松何其不著一藤於石何其不著一蘚也則  
任觀者之各自得之而已卷今藏粵東潘毅堂中書所癸卯  
八月廿日秀水錢載潞河舟次

董文敏封奉政大夫翼所徐公墓表墨蹟跋

明封奉政大夫徐公學周嘉靖甲子同弟學會舉於鄉嘗為  
蜀嘉州又為粵雷州子必達萬曆壬辰進士累官少司馬卒  
贈尚書有南州集孫世淳戊午舉人知隨州崇禎十四年死  
流賊張獻忠之難子肇樑從死妾僕死者十八人贈太僕少  
卿賜祠隨州嘉興孫嘉炎

本朝康熙己未舉博學宏詞官至內閣學士嘗思徐氏百二  
十年以來忠孝節義文章有重於吾郡者不僅以科名今得

觀蘆涇姚侍御所藏董文敏撰書大夫墓表墨蹟冊然後知  
徐氏蓄積醞釀之所由來而攷之郡志有未悉似未見此表  
者蓋表固未嘗刻石也因疏其略以論之其在嘉州釐田賦  
則區法以立役法以均又清鹽茶之權土司嶺柏死族阿祭  
與其妾子應昇爭立阿祭扇兵臺檄便宜從事公率兵九千  
渡瀘斬阿祭立其宗之嶺起鳳而分地畀應昇亂以定然其  
事幕府不以列上也採木詔下川民竭輸公身募眾餌諸砦  
夷絕險冒竊得中程材鑿山通阻會起蟄發洪神木自行而  
出上計京師條上三難六易之議於何大司空以行楚黃耿  
簡肅嘗題其議曰折算策行活川民以千萬計其在雷州固  
爭濶洲防海之戰艦不可分而增置陸哨終公之任盜無竊  
發嗚呼此隨州忠節之所自來矣而隨州之先後門地門才



光於里黨如是謂非大夫之有以啟其緒與大夫八十五歲  
癸丑捐館越一年而葬冊末附文敏復尙書札云三兒皆以  
試事游白下鄉試乙卯之秋也然則其撰書蓋去隨州死節  
二十有六年嗚呼天道靡常作善降祥人世未形之事如文  
敏當日者何得而知之然而君子其有以知之已嘉靖甲子  
吾六世祖魯南先生舉於順天子紫芝翁舉應天戊午錢之  
於徐同年而後有連也載家隨州祠西今徐氏稍衰矣然尙  
書國老之廳隨州之祠屋依然屋後舞蛟石歸立灌莽中而  
白苧村東南徐氏之宗祠在南張橋者放生河畔疎林清樾  
其祀田猶存也侍御題冊謂暫收是蹟以待徐之後人此侍  
御鄭重於鄉先賢之意夫人之賴文字以顯晦於穹壤閒竊  
以爲任其流傳而可矣亦何獨徐氏也哉

跋李繼泉山水

畫於癸巳明萬曆二十一年也嘉靖王子順天榜嘉興李芳  
越十年而壬戌中式未廷試與本省同郡戚元佐項鈞沈元  
華馮敏功王俸張大忠俞南金項篤壽十相錢貢戚于國宗  
宏暹鍾繼元張應治趙巖鄭履淳皆同年乙丑廷試令曲周  
清勁明恕江陰多逋賦患盜移治之以最徵尋擢給諫中蜚  
語謫饒郡丞投檄歸徜徉林壑者四十年今者以賢後人寶  
愛此軸而請跋爰攷次郡之先哲使一溯其祖之同年竊計  
諸家之後人其猶可一一訪也郡丞字叔承號繼泉善山水  
幅中巖凹雲氣滃滃遠峯高出大溪浸山根水莊深曲相連  
樹石蕭疎淺淡設色意匠直逼元人居長水癸巳去壬戌  
三十年非其村園蒔牡丹百種續歐陽作譜時所涉冬而託



興者邪觀於斯而興感已多然則翰墨之於人亦何可闕也  
其子原中丙戌進士己丑廷試嘗令溧陽改大名學職以父  
老歸亦著政績

書陸大夫誓墓圖稟後

乾隆十七年

慈壽恩科順天鄉試吳江陸君燿及載中式迄今丙午三十  
有五年矣君以楚撫乙巳卒官歸葬先塋之次而不知其能  
畫也此其誓墓圖稟癸卯作於任城書院者先是君以山東  
按察乞  
恩歸養太夫人壽終既耐於東顧之阡其時青龍岡黃河築  
濬  
天子亟籌運河隄工以耀鄉任運河道能

特起赴工所未幾仍攝山東布政使司明年擢巡撫湖南今  
其子綱奉圖稟請題乃得見故人手蹟吳江之陸世家蘆墟  
其墓於縣之二十九都最角圩者始大夫高祖諱照然字君  
亮以上蓋一原四冢今圖中水北古木蒼然而石坊豐碑屹  
立曾祖 贈通議大夫諱竣元字廣生墓耐焉水南松楸  
鬱然一林祖 誥贈通奉大夫諱銓字公衡之墓而考 誥  
贈通奉大夫諱瓚字虔實之墓耐於右其東又松林下有兩  
冢則虔實府君之兩弟大夫以府君友愛而營於同原其西  
架屋三楹是為東顧丙舍最角圩一名東顧而大夫墓在丙  
舍右葬太夫人之年所自營之生壙惟不取青烏言陟降相  
觀高曾祖考五世以上水南北兩原如一原焉祖先之魂魄  
往來相依孫子之歲時拜瞻切近南原水周三面墓林之南



稻田昫昫田之外又橫河四通村落矣其誓於墓者大夫寒士被

聖主知遇有年復起驅馳告誓先墓而行是心之誠所謂有如嗷曰者不必徵其誓詞何如國家所重賴臣忠子孝之人豈有外於區區此心者哉綱乎寶此手蹟也豈不以所誓教其子孫而實惟明白其墓處吾是以歷歷於南北東西大夫知之此其蘆墟陸氏先墓之記也與

陸朗夫嶽麓圖跋

乾隆己卯

載奉

命典廣西試回道衡州登祝融峯絕頂明日下山即就道行未能至方廣亦未見嶽麓也今以直之奉其先公所寫嶽麓圖求跋而回憶之然載之未見嶽麓特一日之游耳昔者朱

子三十八歲訪張敬夫先生於潭州范伯崇林擇之侍行遂相與徧覽南嶽之勝倡酬賦詩至百七十首今讀朱子所記既約毋作詩矣又復作詩而仍歸於戒懼警省慮其流而至子喪志且盡錄贈處之篇謂暇日出觀亦足當盤盂几杖之戒蓋先賢之訪友而游山其皆為講道論德也如是伯崇嘗言二先生論中庸之義三日夜而不能合夫是以南嶽之古今游者凡幾而二先生乃渺然不可以攀躋載不能讀朱子之書蓋有媿于朗夫者朗夫學道進進而未已其駐節長沙面湘江而圖嶽麓意蓋在書院也朱子嘗作石鼓書院記矣謂以風曉在位使知今日學校科舉之教之害不可以是為適然而莫之救而援張子敬夫之所以記夫嶽麓者蓋南嶽之書院嶽麓石鼓是已朗夫之按察山東嘗闢蒿庵書院余



爲書其辨志之堂使朗夫而不遽歿於長沙也與朱子書院之教於嶽麓而不惟科舉以爲教其所裨益豈在一時也哉  
丁未八月八十老人錢載跋

張氏角里山墓廬圖跋

海鹽張明經燕昌遷葬其瓜圃府君於縣西南角里山之原將構丙舍於墓側以終老焉而其友豫作廬墓圖以爲贈金粟諸短山松篁連屬茶院通圓之水東西灣環田家梅塢桑塍與煙雲平遠相參差唐準高僧塔處宋秦溪二字石刻猶存此余山居夙願不可必遂者而張子乃依其先人竟得而有之乎夫廬墓始於弟子之於師也孔子歿惟子貢廬于墓上者又三年晉代後多有葬親畢廬於墓次者百年以前吾鄉巢端明先生廬墓至三十年今張子乃踵迹前賢永慕於

角里之山與然余以爲書者宜題作角里墓廬圖也蓋曰墓廬則義屬於墓曰廬墓則義屬於廬矣屬於廬則圖而傳之者明經子之所有事也張子固已首肯余言也夫

九靈山房圖跋

浦江戴君劍溪來爲嘉興府儒學司訓詒我以九靈山房之集而屬題其九靈山房之圖蓋叔能先生司訓十四世從祖也戴氏世居九靈山下先生自號九靈山人山人嘗作九靈山圖出游所至張之壁名其居一時若周伯琦書之胡惟仁烏斯道記之唐之淳賦之丁鶴年輩詩之而今之圖則劍溪所爲追惟先烈而作也於是受讀山房之集率皆有得於道之言自非有得於道者不能爲此言也其待制柳公贊曰朱學之傳至於文安公得其師猶水有源此則先生之所學其



投知己書曰凡其艱難而僅得者不過用以資其詩與文而於古聖賢人之大道則固未之有聞也嗚呼此則先生之所詩與文者矣再觀於圖之崖谷泉樹約畧先生九靈山詩所云屋廬冢墓其處者以想見夫往來柳文肅黃文獻吳文貞三先生之門而嘗與宋文憲先生合堂同席以學其所學也江山和粹之氣蓋適聚於其時也哉夫識小識大道之在人則夫金華之風朱子之緒百世而興起者其猶在浙水之東也與司訓九靈之戴氏又居近鄭氏之義門其怡然高望也圖且有以傳之矣

錄永和甄字題後

口王夫人墓誌銘

井序

氏口郡人也稟質貞口口三從有義四德無虧口口忽邁彌

留日復纏口口正月廿八日歿於口口歲次庚戌二月廿七口口西北十里武丘山口口口子二人長子珣次子口口恐陵谷口口

方甄踰尺之一角左上下斷缺脩六寸廣八寸面刻界道絲紋縱八行半橫七格半正書斷缺識者六十四字墓誌銘甄也出土於虎邱短簿祠處短簿祠吳郡志在虎邱雲巖寺寺本東晉王珣及弟珉之宅珣居征西府時號短主簿因以稱其祠晉書王洽子二珣珉今誌序子二人長子珣次子則必珉也夫人吳郡人始興郡公太傅導之子婦吳郡內史徵拜領軍洽之妻散騎常侍珣侍中兼中書令珉之母惜也其氏今不存矣庚戌穆帝永和六年洽升平二年戊午卒年三十六去庚戌八年則夫人之蚤世其二十以上抑未及與武邱



南史何求何點隱吳郡武邱山蓋以武改虎卽越絕書閭門外之虎邱恐陵谷今歲乾隆戊申而見此輒則其陵谷也且一千四百五十年其書古厚沈實妙參楷隸夫江左嗣興實惟仲父而一門文藝三世善書導學鍾繇法者不以屬之矣衣帶以過江洽與從兄羲之變章草爲今草羲之嘗云弟書遂不減吾則當其書夫人誌自非有鍾衛法者不以屬之矣越三年癸丑而世乃有羲之蘭亭序之傳則是書之出於今豈非希世之寶哉鄒考墓誌之始炙轂子謂起宋元嘉中顏延之爲王球作墓誌今此晉永和墓誌銘也前乎宋元嘉之改元七十有六年且庚戌之葬夫人吳郡內史也太傅薨於咸和庚寅二十年矣二子依其母墓以居又安知內史之不合葬于斯乎王氏家風意常有其爲吳郡戶祝者不然何以

虎邱至今尙存珣珉之東山西山二廟秀水錢載題

神龍蘭亭跋

此本爲宋本無疑後有宋文憲公金華宋氏景濂邵文莊公國寶兩印余藏有文莊墨蹟取勘此印正是一石其非吾禾項氏所刻于明中葉者明矣

又

米氏書史云王文惠之孫居高郵收得褚遂良黃絹上臨蘭亭一本後欲售之流轉數姓而終不果得王虛舟跋其神龍本云嘗見褚摹黃絹真蹟與此正同則此刻當卽米氏所記黃絹本也戊子十一月三日再跋

又

武后周天授元年又十五年爲神龍元年中宗復辟不改元



則神龍周之神龍也於時太平公主借出褚臨摹刻而遂亡之此鈐印有褚印貞觀印則太宗賺得真蹟命歐褚諸臣臨之藏於內也白人閒流轉米芾嘗觀欲售而不果至紹興購得乃有米芾紹興印則此刻當在宋之南渡其搨法紙紋墨采適與鄴所見趙子固落水五字未損之定武宋本同春圃獲此於官翰林時二十餘年矣今以方伯解組里居出觀再得流連而審諦之夫優閒歲月皆沐

君恩卽日者復起驅馳則此帖又將隨之行矣瞬息朽槁能不矜其眼福邪曩在京師數數觀褚臨絹本賜高士廉快雪堂上石者不知其今落何所又五字未損本歸蔣氏失去聞今在江南銷夏記之肥本也其瘦本缺角處有柯九思印羣帶右流天五字已損趙士禎小楷其後今在載所至寶也何

雲與神龍相上下哉戊申六月八十一歲載又題

雲麾將軍李思訓碑跋

論者謂右軍行法李北海得其妙而擺脫之頓挫起伏書中之仙北海雲麾碑有二其一李秀碑已琢作圓礎六余嘗得其搨本四似趙文敏之於晉人頗不似此李思訓碑故知文敏大書之於北海不止出於一碑也思訓碑北海蹟之最妙者此搨當是宋本字之闕損者尙不多其在今日尤當寶惜之至矣思訓善書又善畫推李將軍山水昭道亦善著色山水卽小李將軍余藏有其父子金碧大幅各一軸

題王振鵬墨梅

孤雲處士以界畫金碧稱絕李太僕品之云格力超騰非院中人所能嘗見其人物亦藏其界畫而未知其能墨梅也墨



梅始于華光長老趙子固詩逃禪祖華光閒庵紹逃禪又云  
從頭總是楊湯法孤雲生華光逃禪閒庵之後在煮石山農  
之前余有山農墨梅在紵帳兩幅上持較之正覺其相敵耳  
孤雲與山農固不能外楊湯法也古人之於書畫法往往無  
所不通無所不妙安可以常格拘墟之

題陳小蓮山水

芝之可食而仙槩見於抱朴子蕭靜之得肉芝烹而食之齒  
髮再生此圖烹芝者得非靜之其人邪小蓮之於老蓮猶沱  
江之于白陽也王弼州謂沱江頗足跨竈余于此幅亦云

題北宋院本設色窠石竹梅山茶雀鷓鴣

此北宋院本也二十餘年前見之京師常賣家今年己酉復  
見之禾城往余題趙子固東坡笠屐圖硯云積書巖空又流

轉昨歲在粵今在京不脛而走物類且然哉觀世者可以觀  
化矣

文待詔葵陽草堂圖跋

嘉興沈明經柳坪子清旭小名葵陽十五歲而殤柳坪既墮  
而葬之其師蔣春雨明經銘之余爲書之而陸侍郎復跋之  
里所傳沈童子墮銘也蓋以葵陽能多讀書有夙慧非尋常  
童子比耳今春柳坪購得明文待詔爲李中翰所畫葵陽草  
堂圖乃不勝感念以葵陽之與葵陽適相觸也屬余記明其  
事噫沈童子之精靈其依此卷乎則吾不得而知顧昔之葵  
陽在李中翰今之葵陽在沈童子矣衡山先生又豈知爲沈  
童子圖葵陽哉柳坪其亦可以適相慰矣

題董北苑夏山深遠圖



北苑畫嘗見其瀟湘橫卷董文敏所藏有北苑畫四最後最  
佳則瀟湘也後爲畢大中丞秋帆購去又嘗見李營邱大幅  
宛平同年張部曹晴溪以千金得之然後知無李論猶不足  
信也余則藏有河陽大幅項子京孫退谷梁真定諸家所藏  
皆冠世之蹟此幅北苑皴法不用輪廓其深厚全得山脈起  
伏之勢樹蒼而靜苔潔而圓其爲真蹟無疑又曾見其夏山  
欲雨圖蓋北苑常畫夏山而實皆金陵山也惟瀟湘卷則楚  
山此幅題者歐陽圭齋倪雲林張伯雨許祭酒皆句佳而蹟  
真豈不可重寶之哉乾隆五十八年夏仲曰

沈恆吉山水卷跋

此豈沈氏之西莊圖邪抑豈其有竹居之景物邪溪山灣環  
竹樹茂蔭塢中茅屋數間旁起小樓一人拓窗高臥圖書插

架屋內一婦提攜稚子旁屋一嫗捉箸與稚子飯一女旁立  
竹籬四周籬門一人扶杖仰觀一人背立相向一僮門內指  
碕岸臨溪左右大石磊砢夾水遮映苔點蒼潤溪水四出前  
跨板橋橋陰北巖瀑泉落溪溪灘疊瀉灘岸坐立兩人一人  
濯足灘水中又前高石欲壓坡斜水闊一牛過山嘴一童坐  
背吹笛一牛將轉坡一童立背拽鼻而屋後兩山夾徑一人  
綠陰中騎而來如官人過訪者一僮捧紅囊隨于後布置清  
深氣象靜穆成化四年仲冬陶然老人沈恆石田先生之父  
所畫也先生之祖澄所居曰西莊兩子貞字貞吉號南齋恆  
字恆吉號同齋皆以字行嘗構有竹居兄弟讀書其中工詩  
善畫竝年八十餘同齋山水亦宗北苑其畫絕少蓋不易得  
者成化四年同齋當六十餘石田四十二歲矣聞之石田山



水四十歲後始拓爲大幅於古人無所不師則是時陶然偶作非所謂虛和瀟灑正其兄弟之家學足以傳者邪

蕲石齋文集卷第十四終

蕲石齋文集卷第十五

秀水錢載坤一

跋三

永思卷跋

此我秦溪錢氏五世祖明封禮科給事中兩涯公之仲弟臨江太守東畚公痛其祿不逮養恭錄朝之救命暨墓誌銘表求當世賢士大夫之詩若文彙爲卷而乞題曰永思以志其昊天罔極者也四世祖村庵翁四子長兩涯次東畚次璋樂閒蚤卒次琪西溪諸公誌墓時謂其一庶出尚幼者也至於今三支絲絲矣夫人非孝友何能及遠蓋不惟身以之立家以之傳也我錢之先人既孝弟傳其家我錢之後人固當思其思已且思其先人必以思其後人不惟愛其後人之賢而



莫不憂其後人之不賢如後人之賢而弃其不賢則先人之  
思有愀然者夫能使先人之無所用其愀然者而其思也至  
矣此下武之思之所以無窮而通神明光四海也嗚呼載亦  
不幸兩親歿而始邀一第今乃敬觀此而敬識此也尙忍言  
哉尙忍言哉謹按卷首篆永思字者景榜眼暘暨後題詩之  
黃芳甘公亮易綦黃卿序後之歐陽鐸皆正德戊辰進士公  
之同年也誌墓者祝萃成化甲辰進士虛齋先生公之師也  
表墓者黃瀾宏治癸丑序前者楊果宏治壬戌而題詩之鄧  
庠成化壬辰李熙宏治丙辰周倫魏綸皆己未蕭世賢周任  
皆乙丑沈霽鄭浙皆正德辛未呂夔李相應大猷皆甲戌公  
之友也秀水范誥宏治庚戌進士范璿從子載之同縣先哲  
也若夫歐陽恭簡之清節著在史冊而鄧大司徒之壬辰登

第去正德甲戌且四十三年以視諸公不獨臨江之老輩云  
乾隆三十四年歲次己丑六月既望兩涯公子太常公顯忠  
祠下孫載拜跋

小瀛洲社會圖跋

海鹽縣明嘉靖壬寅襄陽守徐咸東濱修社會於其小瀛洲  
自爲記而圖之者陳詢今此圖萬厯丙申徐俊所仿蓋有溯  
先哲之流風撫遺蹤而欲見者其去壬寅已五十四年也圖  
之會者十老布衣朱朴西村年七十八臨江守錢琦東畚先  
太常叔父也年七十五光澤令徐泰豐厓七十四福建參政  
吳昂南溪七十三布衣陳鑑句溪七十一龍巖令陳瀛古厓  
社之主人皆六十四海甯衛劉銳海村六十二南昌守鍾梁  
西皋五十九資聖寺僧陸永英石林五十七淵乎森然其道



德之光也我東畚翁淳厚悃悃壽至八十一時醞醋林泉  
雍容杖屨夫豈偶然哉其鄉舉者皆連科最先宏治辛酉東  
畚而甲子南溪豐厓而正德丁卯東濱庚午西皋也其登第  
者亦皆連科最先宏治乙丑南溪而正德戊辰東畚辛未東  
濱甲戌西皋也海昌祝虛齋先生萃以工部員外郎田居講  
學南溪東畚先後從之游爲同門生豐厓東濱同母兄弟也  
古厓國子生好詩與西村句溪石林爲詩友西村教授生徒  
以自給壽至八十六無一日廢吟咏而句溪與之齊名今朱  
家子孫耕桑於其西村曲港喬林無恙也其園曰餘春疊石  
爲小東山海村圖經稱爲忠信人初東濱構小瀛洲鄉人亦  
稱之曰南園久而南園以禦倭捐爲倉前此海甯衛指揮使  
司之所以設於縣中而海村蓋其使也石林之詩沈明臣謂

前有文湛永英後有戒逸斯德審觀此卷無事悉數于以往  
復想像醇古寬博之儀型蓋二百四十四年矣圖中石橋溪  
水小亭湖石紅藥芭蕉竹梧石几畫卷棋枰壺榼猶是其時  
孟夏初會于時賞軒之景物也顧余嘗見鄭元祐小瀛洲記  
墨蹟卷而爲之詩元末兵興茅山白雲觀道士沈澂避地海  
鹽聽潮里鑿瑤池架竹屋海中羣峯南列如青玉案署曰小  
瀛洲而刻石于癸卯至正二十三年也不知東濱當日其不  
知之而偶合邪然亦何必東濱之知之也沈道士之小瀛洲  
自不若諸耆宿之小瀛洲矣其人其事之可思而其地何有  
哉張子芑堂購圖請跋以載錢後人宜得拜東畚翁且以載  
今年七十八與西村入社之歲適同其踵而藻飾之也其可  
與卷中書徐記者東畚翁曾孫元選其字善生海鹽縣儒學



生

錢臨江四書文跋

同溪草堂先大夫之居後樓書篋一掃檢得臨江公四書文  
 十一首明坊刻曰文紀卷二十之殘葉公正德戊辰同進士  
 出身一百四十名半邏之錢始起家是科及第者呂相景陽  
 戴大賓二甲一百一十五名三甲二百三十一名浙江籍者  
 實四十四嘉興二人其一孫璽公之姪我太常公嘉靖壬辰  
 公子萱乙未芹戊戌皆用四書文起家以有子孫至今然則  
 四書文其可不重哉夫讀書明理致用豈惟是博科名哉然  
 今錢之澤慄慄乎懼其不克延鈔公文而言之危我後人其  
 不寶此以讀其書乎公所著有東畚集錢子測語作族譜可  
 為法自載以上至太常兄弟七世墨蹟載積歲求得之獨未

得公蹟志于此或者其猶及得之也乾隆戊申裔孫載八十  
 一歲

太常公答蕭先生札墨蹟跋

右札為公以禮科給事中嘉靖十六年丁酉奉敕查盤湖廣  
 廣西錢糧明年公年三十七在桂林答廣西按察副使蕭晚  
 者首云賓州會對賓州柳州府屬公查盤至柳與蕭相見也  
 昨來桂林又倥偬相別公自柳回桂也恭喜令郎高中是年  
 戊戌會試考國子監十七年進士題名碑三甲一百五十七  
 名蕭世延成都府內江縣民籍公廣西舉劾官員賢否疏實  
 列副使蕭晚老成練達民夷懷服以是知蕭先生當即蕭晚  
 矣聞狀元出在江右是科狀元浙江茅瓚榜眼江西羅玘札  
 尾仲夏廿一日時在桂林所聞訛也中答查盤事各相守法



奉公真懷懷憲臣宜作三江神明之感惠三江府江左江右江也平梧諸處相報平樂府梧州府也祇開奸吏騙局地方有司之蒙其弊而相格釐剔難遽明也安可欺誑此心憤懣不能自平公之在廣西久于湖廣鉤稽摘發尤不任吏胥鄭端簡公撰行狀謂積勞成疾肩膂為偃公之未嘗自欺其心公之所以不顧其疾末云輒以告執事以執事至公明也如副使者守法奉公遂疏舉之矣然則此百三十七字二尺半許之簡閱二百四十八年墨采如新足以見公之心蹟而七世孫福胙自半邏故家之散佚奉以歸載俾載七十八歲猶得想見公立身信友忠主庇民雖作荅于頃閒而無隱無飾有如此者比還朝轉右以星變極言得失削籍為民壬辰登第歷仕八年家居講學十六年歿而卹贈列傳明史祠祀海

鹽至今夫天道必應乎人事即此亦可以證據也已嗚呼以祖宗之德業然後詒子孫若夫子孫之學術無論多師乎曩哲必先識認其祖宗思公之任何如思公之學何如載徒老而無一可者矣公之子姓而能鑒於載詩云永言孝思其在後來之賢者乾隆乙巳六月朔日七世孫載謹跋

錄先高祖侍御公七言古詩一首書後

劉朝萊道士乞書道德經第六十三章感而書之  
德怨難易何以云規中一寸有二分冥心上下欣所託絲葉不翦尋斧斤世人慮患苦不早馳驅逐末雷殷殷黃金散去寡俠士羊羹不來亡將軍少年結客豪氣許君不負人人負君所以猶龍尚元旨煨煨獨揭五千文五千文尚元旨能令闕里參其髓華陰道士劉朝萊期余蹇筆為書此因言洞口



多蒼蘚五丁開下傳河豕織腰時抱玉女峯素懷欲結驚人  
理悲予形畛何深堅落落塵寰譽復毀行與道士歸休乎大  
小多寡渾無是

右先高祖侍御公七言古詩一首乾隆丁巳從祖界官陝西  
奔太夫人喪過華陰宿於廟見道士几陳明人詩冊則先公  
墨蹟一葉在焉亟取以南而歸諸先君付載藏之者先公遺  
詩先大父又鶴府君拾諸燼餘曰松龕贖橐僅二十一首去  
公之歿且九十餘年復得是詩手澤猶存愛惜寶貴每一誦  
之如見先公焉道士劉朝萊乞書道德經其事亦見牧翁初  
學集乙亥古詩一首題云華山道者劉虛中摹刻道德經於  
崖石懼其爲山靈之累也作詩送其去以諷止焉當卽是朝  
萊也先公之劾魏璫爲崇禎初元實三十有九歲則是詩之

作固四十歲以後矣夫一詩之有無何所關係獨念先公當  
日自閩歸里先曾祖雍頌府君蚤卒祖與叔祖甫童齡旣圖  
書兵燹矣迨易簣於馬家廟前三日則盡取平生所著述焚  
之以是我子孫獲見先公詩文蹟蓋寡昔虞邵庵書其先太  
師丞相雍國忠肅公所著誅蠹賦謹識云詩書之緒不絕如  
綫感慨今昔血淚隨之蓋雍公文集嘗刻於蜀而版盪燬後  
竟不可復得邵庵先參政僅從道士侯頤軒傳誅蠹賦橐一  
首洎邵庵書時參政歿又久矣追維先緒宜其言之悲也載  
自先君弃諸孤歲旅食京師淹滯不得歸而今乃錄先公遺  
詩先君所手付之者仰維先緒悲來填膺其何敢效虞公所  
云不絕如綫邪用告我後之人有能讀先公詩者乾隆辛未  
八月廿日元孫載敬書



陳太夫人花卉冊跋

是冊今為弟福胙所藏康熙癸巳載六歲始至祖居半邏之承啟堂拜曾叔祖妣陳太夫人於書畫樓下見太夫人作畫辛丑文端公登第迎養京師雍正乙巳南歸僦居郡城以兩孫汝鼎汝誠命載投讀於是日蒙教誨曰見作畫是冊祇六葉木蘭燕子櫻桃白練諷英蜂蝶秋荷安榴啁雀水仙松枝運筆清蒼設色古澹一花一葉皆載所嘗見墨香心靜如是寫者款為贈光祿大夫曾叔祖廉江先生所題辛卯之夏以贈野堂姪孫北上者野堂世父觀察少而北游廿七歲壬午中順天副榜辛卯春歸自京師其年秋應浙江鄉試款所云北上當是歸而鄉井蕭然復欲出門而未能也其時舊村一水南北喬木修篁兩房詩禮之教目見耳聞皆成至樂先大

夫以癸巳之冬游京師曾叔祖嘗來郡中輒有以切切教督載者丙午載十九歲矣常侍太夫人每夜分與之告教祖宗遺事不少息蓋一言一動凡所以隨事而提撕人生無百年思此日月何可再得也野堂世父亦擅花卉自太夫人以畫力貧一門諸從無不工畫其時實有家風矣乾隆丙午七十九歲曾姪孫載謹跋

文端公限香課時文帖跋

右限香課時文之法歲在甲申先文端公因今中書兼山沈君而言之也兼山為省堂觀察令子元年丙辰載應詔入京省堂以拔貢赴廷試相見于文端邸第乙丑會試文端為總裁觀察實出門下康熙甲午觀察尊甫固廬先生與文端同舉京兆而文端次子從叔雨時為先生女婿我文



端公樂育後進隨時隨地因材而施之其於兼山則不啻誼  
深情重而言之若斯也既兼山果舉京兆於辛卯載之壬申  
舉京兆實出山西孫文定公之門固廬先生尊甫心齋閣學  
公康熙癸巳爲總裁文定實出門下以是載雖後時而於閣  
學公爲小門生然則載之於竹墩沈氏亦具有深誼今日兼  
山之屬題文端是卷固其宜也且載於沈氏操堂先生諱樹  
本畏堂諱樹德東甫諱炳震幼牧諱炳謙皆忝同徵之誼而  
平安令雨蒼諱作霖同第壬申言念疇昔忽忽成二十七年  
四十四年以前之事聞之竹墩風氣淳朴自其始遷祖餘慶  
公由千金村而來聚族居者已迄於今錢塘厲徵君樊榭詩  
云十字水分菱葉外三家墅繞豆花初諷之村港林扉宛若  
可見今且欲從兼山約竹墩之游也先文端壽終八十有九

而從叔孝廉郡丞雨時中道徂謝且六年矣人生少壯役志  
科名營心仕宦亦何爲哉亦何爲哉雖然祖澤之世守不於  
有道德而能文章者將誰歸哉夫君子亦行其所常而已矣  
乾隆己亥五月六日錢載書

畫木筆月季跋

康熙癸巳載六歲始隨先大夫至中錢浜得拜太常公之承  
啟堂先公著述曰承啟堂彙者也楹帖云百年堂構承先澤  
萬卷圖書啟後人廣庭之前又堂則不記所額矣其東桑樹  
陰陰有培元堂未圯也越田而西拜石軒慶原堂又越田而  
西鶴和閣此港南也港北所見耕昌頤正諫草之堂西半完  
之圃又西則都不常至矣其東木橋桑樹陰陰我五房祖戶  
部公宅址公明萬厯年析居府城我祖又鶴府君徙老屋之



材築於城中以故先大夫之回溪草堂在嘉興府治東其時諸房鄰比護居之竹往往蕭蕭然蓋二百年於茲矣今水南北伯叔兄弟之所廬大半猶是我家自臨江太守作裕後之堂於三都鄉人稱之曰南錢太常考兩涯公臨江兄也而稱其居曰中錢中錢之北族居而別村曰北錢是日過南樓見大梧桐樹之陰木筆作秋花月季閒之載走攀月季一花長者呵止頗自以爲惡今者程氏姑命作畫適畫兩花用是從容憶述之夫固以姑之生長京師齒小於載而有所未見也南樓在承啟堂之西後則書畫樓從曾叔祖光祿公陳太夫人居焉其時文端公方貢太學明年甲午乃舉順天鄉試又後則山樓已圯矣今承啟堂處惟書畫樓巋然獨存若夫堂西古朴之氣長厚之風告教之言其何能以盡述姑文端公

長女從宦京師既贅壻上舍君蚤世歸其先舅農部公之故第於朱涇立貧家撫嗣子實曰孤撐矣去歲丁酉載自山東還朝表弟維岳官中書迎養母夫人而邸舍同巷表弟我子世錫同舉戊子也從祖母俞太夫人所生姊姑而弟少司寇叔叔居巷西往來言話飲食饋問儀節有常不惟如文端未予告時且何減南樓之風氣而外孫我從子楷選貢廷試依於外祖母斯其爲前嗇而後亨者乎於是畫花之去見花六十有五年矣載之侍陳太夫人也久祖宗來事太夫人蚤夜與言之文端在日見輒與言之先大夫之奔諸孤也三十有二年矣何者可忘何者不可忘也夫父黨之親首所聯屬姑以陳太夫人女孫念重母家木筆月季何足述有其見之木筆月季不得以爲無知矣太常先澤尙有存者載且老其



烏能勉勉自力以從於錢後人之後

畫松跋

程氏姑命作畫得公姑曾祖自號也能畫松陳太夫人公第四子婦也能畫花鳥人物而能畫松載六歲隨先大夫至祖居始拜太夫人見太夫人曰於書畫樓下畫家無宿儲而請畫者之金至薄而日以繼則蚤起遣老僕進祿挈飯籬過木橋轉而西出塘口過渡入沈蕩鎮市以糴米其時跨塘大石橋未建也糴米歸則從曾叔祖廉江先生之文字君屐待飯於南樓下先生之教文端公幼曰必盡讀十三經二十一史時文必歸太僕先生之自爲詩必蘇文忠書必董文敏時而詩書峻整疏宕必祝京兆唐解元古人不善治家人生產一語先生若躬行之而以見主中饋之賢自文端公康熙辛丑

登第後今諸叔皆仕宦而當日之艱難陳太夫人蓋如是也夫有邵家室幽風七月詩人之於王業且云然而況於士大夫之家得公之畫松嘗見大幅夾以梅花陳太夫人之畫松幼日聞半完老人爲作歌半完老人先生從兄而野堂觀察從父祖老人居港北先生居港南一時諸從皆能畫能書而觀察之花草尤不可及者雍正初元文端公迎養太夫人於京邸乙巳太夫人歸自京師賃居府城東角里街嘗畫松千山萬山鬱葱外一枝兩枝拳曲餘則有虬仙者題之云己酉載二十二歲猶讀書太夫人所鄉試被落始臨摹太夫人畫三數幅其實載何能於畫哉常常意爲之而已矣今命之畫而畫松夫比姑之節以松豈徒君子謂之善頌哉然畫則不啻其支離矣我諸叔見之而以思夫陳太夫人之時則可



乾隆戊戌秋七月

跋蒯氏妹畫冊

蒯氏妹從叔郡丞雨時女文端公孫女南樓老人陳太夫人曾孫女也能畫花卉學太夫人請題其冊夫畫必多見古人沈啟南不專其家法余之於畫嘗意爲之而非其能然觀于唐宋元明之蹟則不少矣至于家學康熙癸巳載六歲曾叔祖廉江翁攜之上學堂是年始至中錢浜祖居於南樓之北書畫樓下始見太夫人畫明年文端舉京兆也其時港北野堂觀察世父蚤以花卉名高叔祖信安教諭得公畫松嘗見一巨幅馮氏祖姑名壽幼卽學太夫人花卉施南叔祖暨承啟堂東西諸從時皆見其作畫承啟堂者明太常公登第後兩涯翁所築太常承啟堂橐人明史藝文志也然是時港南

初未嘗見不破之屋已而承啟堂毀南樓圯港北耕昌堂毀又將六十年矣而太夫人自爲錢家婦力貧擅花卉兼人物山水能畫松去年丙午嘗題康熙己巳所畫魚籃觀音像太夫人生庚子時年三十也文端生丙寅時方四歲嗚呼當日之艱難景象不見太夫人者由此可想見哉而書畫樓半圯至今獨存雍正乙巳太夫人以文端迎養歸自京師始僦居郡城之角里街命載授汝鼎汝誠兩叔經於是日見太夫人畫戊申賃居城內今載所居百福巷之東北則又教讀者三年其時文端施南皆清宦猶見太夫人藉畫補不足而自署曰南樓老人今同時見作畫者無一人矣癸丑始買今壽萱堂以居乙卯文端視學直隸復迎養而太夫人以丙辰終京邸越今五十有二年嗚呼日月其如馳矣前此二十年老人



之教誨音容不忘在日後此四十年文端之清宦歸田少司  
寇郡丞諸叔之繼起備荷

國恩而丁酉十年以來又諸弟連科登榜略如先世太常儀  
部永州兄弟科名之接踵固皆知老人以畫力貧佐廉江翁  
承舊門遺澤艱難種德之所致矣然則知老人作畫時有  
未嘗望及如此者蓋種德者之於夙夜之天豈其有所望而  
且以自必矧夫其繼之者而或厚其積將無復有所以天者  
邪而先期之望何足以及之然則無所望而有以得者其德  
然邪抑無厚其積而有得之多者其或然非邪固將待夫凡  
我錢後人之繹思之而各有合也 石渠寶笈儲藏陳書畫  
冊軸俱有其以畫力貧也  
聖主稔知之所以於陳書之畫

親加題識屢荷

褒稱載蒙

恩召見嘗承

天語曰陳書是好人蓋其德之賢之所克受而豈徒以其畫  
哉夫女子之職紡績織紝是以老人嘗製補紡小印妹亦不  
及見老人者其將以是為補紡也與

萬蒼翁乾隆辛亥八十四歲小影跋

乾隆五十五年龍集庚戌

聖天子八旬萬壽大慶普天同樂誠懽誠忭 皇十一子題

錢載 稗石齋詩集長句二首長子世錫 赴

闕祝

釐輦下聞之鈔得而歸中有萬蒼翁三字載 取以自號於是



乃有此春園之繪載家未有園也然畫則必有園矣載三子  
七孫今有一曾孫四歲俱寫入園中其仲子三孫則爲從兄  
後以後於伯考者載蒙

聖主高厚深恩在部日革職革任未令去官及京察奉  
命衰邁難以供職迺蒙

恩予原品休致癸卯歸田已八年矣既成斯卷遂自書之蓋  
仰感

天恩永示其後禮部左侍郎錢載自題

蘄石齋文集卷第十五終

蘄石齋文集卷第十六

秀水 錢 載 坤一

贊

司馬文正公像贊

黃面霜須深衣大帶惟幼學壯行而邦國斯賴嗚呼如公克  
艱厥臣以家付子何有家以身付醫何有身

文公朱子趨朝像贊

玉闕金殿曉月寒雲緋魚趨進經帷侍君元祐之程紹興之  
尹立朝四十六日崇政說書惟允是像追摹何本仰之端躬  
肅容是年六十五歲誥實眷其儒宗

朱西洲先生像贊并序

吾郡海鹽明之耆宿成宏正嘉閒有西洲西村兩朱先生右



像則西洲朱先生也吾七世祖太常壽先生序云少讀書西洲翁家題別卷桃源圖亦云束髮云云先公生宏治十五年嘉靖元年二十一歲叔東畬令盱眙十齡從叔盱眙又從南都則束髮讀書先生家其正德年也嘉靖壬辰先公三十一歲成進士仕八年而歸田又二年辛亥乃爲先生作七十壽序則先生長三十歲也顧先公承啟堂刻集云辛丑夏孟朔日值翁初度實爲七十之前一年今卷中所錄云嘉靖壬寅夏四月初一日爲西洲翁七十初度則先公之蹟而先生改定也先生之自題桃源云七十五翁則二十六年丁未畫也而先公題云余今年讀書且五十則後四年辛亥也先生之辛亥自贊像云苟能師乎衛武先公之題桃源具述之則耄而好學哉八十翁也越三年嘉靖三十三年甲寅先公卒所

周旋於兩朱先生者往來翰墨當不止是而今安可得盡見哉惟與朱翁西村詩有云每趁秦溪溪上月步欄相伴醉清風今讀西村之題桃源以八十三翁而爲長律甚閒適則信乎有道者之樂與有道游也而安得追其杖屨哉別卷題者先生之從曾孫學顏進士郡丞從元孫泰禎白嶽侍御先生之曾孫學章明季諸生鄉人稱節隱先生者也八世孫炎乾隆丙戌進士謁選來京奉兩卷以示而載敬爲先生像贊曰孝弟謹信將以學文必先親仁是爲我祖就塾所見之善人而小子載猶得於二百二十餘年見先生於畫蒼然貌頽然身嗚呼見西洲矣憶西村其孰主乎其孰賓

豐陽馮公像贊

并序

公諱臬謨字明卿海鹽人明嘉靖庚戌進士由刑部郎中出



爲江西按察僉事歷廣東參議副使福建左參政公之分守  
惠潮值倭夷海寇峒苗相連作亂公出入賊中生死不避解  
圍說降擒渠埽穴粵事以平具詳門人同縣朱元弼鍾兆斗  
所紀時相厄之僅擢參政福建未幾中言者奪職屢以邊材  
薦不起江西青原山羅念庵鄒東廓聶雙江郭平川講學其  
閒公數與諸先生游而所得益深方公未第時先太常田居  
講學太原趙文谷視學兩浙特賞公遺書太常而介以及於  
門兩家道契太常孫文華殿中書舍人載六世祖巨源府君  
則公之壻也公之外孫載高祖侍御孚于府君也今公七世  
孫孝廉桂芬奉公遺像請題敬爲贊曰  
儒生講學能立戰功王文成後同郡如公肅瞻冠袍川淳嶽  
峙誕我先妣詒今錢氏白鶴之園墓在管山讀書耕織百世

而還

星垣陳封公遺像贊

壬申之春獲交長公方載召試官中書而曾未登堂以拜  
翁旣戊寅蒙締兩家之好庚辰遣我子贅壻於杭而明年翁  
以考終越五年辛酉長公今侍讀奉母夫人挈吾子與婦來  
京師而乃見翁於圖中嗚呼藹然者容條然者蹤維後之昌  
維德之豐維道之充其探梅西溪其采藥南峯北峯亦嘗願  
偕翁以逍遙而乃孤我之短策

長甲翁圖贊

翁兄我師兄儒弟醫左手三甲過尺三十年餘養之兩迎

鑿

天子知孟曰養性蚤得窺年逾六十半白髭松林藥苗多采



采柰樂何

翁姓桑氏名鼎元乾隆丁丑 翠華再幸錢塘鼎元隨耆士夾道捧香跪迎 上顧見其手爪壬午 翠華三幸錢塘鼎元捧香跪迎 命羽騎戒勿震恐于是 上遙識之 駐問養此何為鼎元以養性對 上頷之

虔實陸翁小像贊

蘆墟環堵家有清風定羌老尉中憲贈公卅年聞名今見靈表哲嗣王申同舉京兆無忝所生實惟中丞輿論既定家風是承翁翔霄兮我思公子秋沈寥兮渺然湘水

沈母朱孺人像贊

鞠孤而游以養母也歿不奉含痛難咎也追慕母顏出自手也母德可知賢厥後也展圖髣髴朝拜夕觀比於刻木信有丁蘭嗟我亦人悲不逮親媿母之子憶寫母真

封太宜人程氏姑像贊

十五而嫁舅歿姑存十八而孀其貧其屯力復舊宅力營先

壟力教嗣子百無震悚維造爾家以報所天文端有女如丈夫然子官中書今成進士銓部也才皆由母氏丁酉迎養繡襖孫男我歸山東同巷城南昨歲寫真歲五十七 覃恩始膺 旌門計日告於程後其德其貞敬之我姑憂患以生



稗石齋文集卷第十七

銘

勞硯銘并序

康熙戊戌先子歸自京師以授載後縣府院歲科鄉每試必與俱乾隆丙辰

召試保和殿亦攜之蓋以筆耕食者既三十年所壬申鄉會試未之從

廷試成則襄役焉念疇昔之劬也敬為銘曰  
學兮載之耕非徒獲科名硯兮輔學兮載先子鑒汝貞

新硯銘并序

恩科鄉會試中式硯癸酉六月錢載自銘曰



辛未冬甫予從壬申春秋卽爾庸爾亦知夫天邪余舊誠拙爾新詎工

小硯銘 并序

大錢十買之琉璃廠澄泥也銘曰  
材雖小道自尊若貴賤不以論

王少詹燕所贈蓮葉硯銘

少詹王公贈我硯琢成秋蓮葉一片其閒不合若陂淀水盈  
盈兮四洞漩獨立獨立晚風戰美人美人幾相見

紫瓊硯銘 卽詩以代

宋末元初舊製存爲開生面與重論菁華祇合攄經訓質樸  
還應付子孫

乾隆辛卯四月朔 日講起居注官詹事府詹事兼翰林院

侍讀學士錢載題

紀少僕心齋小影硯銘

石兮次玉玉兮其人兮六籍親石兮寫其真

殿試雙池硯銘 并序

乾隆乙未製而銘之以俟夫用此硯者

磨右堂多水淡墨爲水蘸以融左池濃墨爲墨理情者惟君  
子德磨左如漿納池指堂淺蘸池濃少滯也捺右淡發其光  
若夫黃連或燕支水宿磨汁壺以入準此重諧功倍集敬  
之敬之學而時習

淄川石硯銘

淄川石次端溪乾隆丙申錢載題

又



盛表弟名百二令淄川石是寄琢者馬孟章唐亭硯式仿唐世豈無元道州又何必浯溪泱泱晤臺蒼蒼

又

唐齋硯并序

浯水名則浯溪而吾之溪矣晤亦山名則晤臺而吾之臺矣由是而吾之亭則唐亭矣念昔道州唐亭硯背刻紫霞字石色如紫霞今以仿舊乃名其齋于硯悵唐式之不多見也遂復申所意而為之銘曰

易亭而齋義仍其唐吾齋渺然矩式三吾維吾以唐奚不可乎

乾隆五十五年龍集庚戌鳳池坊百福巷八十三歲老人錢載

又

欲銘背先題左今且自號又奚不可八十三歲唐齋錢載

山東閱卷硯銘并序

奉

命視學山東閱卷曾用此淄川石硯乾隆丁酉六月廿八日

秀水錢載記

通書曰公於己者公於人未有不公於己而能公於人也載去山東後復錄以篆銘

紅絲石硯銘并序

乾隆丁酉得之山東其絲理然也

前如層嶂後如奔濤以詩以文其雄其豪

紅絲石桃榭雙實硯銘

唐齋文集卷十七



相去何啻幾千里東海度索山桃西域安石國榴翰墨之緣  
兮友聲是求實兮實兮歲其秋硯兮硯兮德其修言有枝葉  
爾不硯恥行無枝葉硯不爾憂且爾之不慎餘兮硯故不背  
而悔不面而尤桃榴其侶其儔

政和鳳池硯歌

卽以當銘

背凹玉筋鐫兩字元年八年都不記賞家每翫宣和印道君  
先識政和義面篆几字涵小池兩旁山形低參差一鳳翱翔  
儼欲下九雲左右相繞之其黑如漆潤如玉其光如鏡叩如  
木墨如油兮磨無聲南唐坑兮端州谷乾隆戊戌春王正錢  
子購得踰瑤瓊六百六十幾年刻勉旃昌文立修名

紅絲石硯銘

乾隆丙申夏五奉

命視學山東明年試青州門掩春風梨雪溟濛觀黑山硯材  
非理黃絲紅迺絲黃理紅琢於濟南四照樓月皎霜空蓋柳  
誠縣始以爲第一唐彥猷之所賞見稱於歐陽公還京而銘  
之戊戌三月仍在澄懷園中

瀛洲硯銘

并序

乾隆戊戌四月 皇十一子以

載于世錫

會試中式詒之硯

宋製也其背鸚鵡眼且十有八既而

載于蒙

上恩改庶吉士

載

乃題硯曰瀛洲而銘以付

世錫曰

擇其善者從其不善者改必有師必有師三人且然何況十  
八人于茲敬哉敬哉 皇子教之矣

蕉葉白硯銘

并序

乾隆四十六年辛丑科會試奉



命知貢舉三月初六日入闈攜此硯銘曰  
方執圓融擇善而從肅于外惟至公

禮部左侍郎錢載

庚寅所記硯銘

并序

臣載恭承

正大光明殿

御試乾隆甲戌散館戊寅癸未大考翰林丙子己卯壬午考  
差皆攜此硯庚寅四月五日記閱卷丁丑庚辰丙戌三充會  
試同考官已卯廣西正考官乙酉江南副考官皆攜此硯六  
日載又記刻于石久矣癸卯銘曰

學道本也文末也未嘗學道而仕本之撥也於是而有文其  
跋躐也其淤闕也緬遺經之興起悔莫追以徒云已瘵職業  
何有尊聞

又

六十三歲偶然記辛亥於今八十四歲其有秋兮老將至

石耕硯銘

并序

乾隆甲午科江西正考官錢載閱卷硯載題乙未武會試充  
正考官攜此硯閩鄭際唐代記丙申視學山東亦用此硯杭  
李汪度記一石之耕其穫也門生  
皇十一子作既皆刻之癸卯銘曰

霑祿兮薄田作頌兮豐年

敬告硯銘

并序

乾隆己亥科江西鄉試正考官錢載閱卷硯庚子科江南鄉  
試正考官錢載閱卷仍用此硯既題而刻之矣癸卯歸田銘  
曰



理學則陸當湖博學則朱秀水同郡有閒世之先賢汝生幸  
乃爾嗟馳騫於科名少不學而老無成勿前車之徒鑒敬告  
我後生

井田硯銘 并序

舊製頗佳微有斷紋二十年前購之琉璃廠肆癸卯蒙  
恩歸田老矣不能讀書掩關百福巷中外閒請作畫者常致  
千錢亦藉以自給爰加洗滌何可闕辭銘曰  
井九百畝八牛耕今惟一牛臥不鳴老買一牛少不習耜剡  
蜃摩槩無及牛兮飲我墨池幽折枝寫生亦有秋

曹明經種梅古瓦角硯銘

是瓦角非瓦頭益壽長生之字皆書於瓦頭瓦角雖無字知  
其有漢唐之春秋是惟遇好古之君子從事翰墨以敖游

五鳳三年甄硯銘 并序

漢五鳳有四年吳五鳳無三年則此五鳳三年之甄乃見西  
漢隸書矣海鹽秦置縣今縣石塘東潮退沙灘皆地之齧蝕  
洪濤者昔人於此拾得井甄知是東晉屯兵處則今之拾得  
漢宣帝時甄尤可寶哉琢爲硯錢載觀之銘曰  
乾隆乙巳出海壩是爲西漢甄歷今一千八百六十有三年  
汨之石浦登之文房寶書其永傳

舊坑淺紫石硯銘 并序

乾隆己未得此硯於項襄毅宅東書肆中碎未斷也丁卯北  
上所居回溪草堂後之樓無他長物癸卯蒙  
恩歸里重拂拭之丙午仲夏銘而匣之銘曰  
紫霞可餐何如馬肝



一掌經硯銘

有趙子昂氏印一

并序

宋製也即無趙王孫亦足以自見誰與假借之將謂附驥尾涉千里邪硯乎是欲蠶蝨爾也銘曰  
砥行立名獨處堪八駿之一如玉潭

匏翁家藏蘇子由硯銘

并序

嘗見蘇文定子由二字方印今此硯刻之宜為匏翁之家藏矣然匏翁藏此硯豈知後之亦諡文定邪匏翁學蘇文忠書以子瞻蹟題子由硯相得也況甚發墨乎觀者或譏其遜下巖品非也此當是米氏硯史方城縣葛仙公巖石品在端州之右遂銘曰

宋蘇文定公之硯明吳文定公所藏善哉乎石理發墨為上吾蓋聞諸元章

乾隆己酉秀水百福巷八十二老人錢載

釋石齋八十三歲硯銘

乾隆五十五年龍集庚戌

吾齋至小偕爾雍容書不必多讀則自充理不必至當則有功何古何今惟善之從竟日默坐樂亦在其中

萬松居士硯銘

青松萬株何處永安湖北蒼山先人愛而卜壤小子歲時其閒從初居士自號此心至今炯然豈託萬松老人亦既四十餘年

晉咸和墓甄硯銘

吳興山冢破蔡窵出甄咸和燒己丑某斯藏壙有七錢萬枚甄獲一誰須千秋長樂字琢硯可磨其著述

南宋秀邸月林書院硯銘

并序



月林散清影少陵奉先寺句也春渚紀聞云東坡先生翰墨  
宣和閒內府復加搜訪一紙定值萬錢譚積以五萬錢徹沈  
元弼月林榜二字今書院之名月林其本此與銘曰  
榜取杜公詩蘇公嘗書之恍一林之清影仰天月兮蛾眉

米禮部硯銘

兩已相背奇牡耦配

合璧連珠硯銘

元日午時合璧連珠維乾隆辛巳應

德靈符欽天奏請宣付史館

諄諭不行大哉功巍文煥

恩予原品休致禮部左侍郎錢載庚戌銘以恭紀於己丑所  
刻合璧連珠硯之匣

萬里硯銘并序

乾隆庚子奉

命告祭於秦蜀攜此硯三月十六日京師發六月七日還赴  
熱河恭復

恩命回京奉差典試江南銘曰

山川萬里記所經庚子紀

恩庚戌銘

洮瓊硯銘并序

趙希鵠洞天清錄云端歛外惟洮石綠如藍潤如玉發墨不  
減端溪下巖然在臨洮大河水底得之寶無價爰銘曰  
美哉崑崙水之過臨洮也合洮河東北趨產石綠沈色石湖  
亦嘗以匹紫琳腴今入唐齋雖老尚多寫作則懷此璧也豈



若微之之識硤硤

擇石齋硤銘

惟正斯勤惟勤斯正

一萼紅硤銘

丁亥冬日出西華門馬上望晴雪賦 錢載

鳳城深又瑤花晚霽敲鐙過橋心天視樓臺水明島嶼凝望

都赴幽襟待帘底驕裘換酒怎便有江外玉梅簪畫舫西湖

籃輿鄧尉此際招尋 螭右十年恩戀近鑪煙扇影綠鬢絲

侵官樣文章俊流翰墨猶柰孤負於今幾回夢鷗雙鷺隻儘

荒了漁汊荻梢沈莫道西山笑人旋釀春陰 庚戌孫男昌齡寫錄

力田逢年

朱西峻先生所銘硤銘

汝形如月盈而不闕筆墨友之光華發越昆田今銘曰

銘者笛漁錢載櫝之匹玉蟾蜍

大泉三十硤銘 并序

明尚書姚羅浮公六世孫雲驤乾隆十八年大錢三十買此

硤今乃見詒舊沃村石也 載十七年成進士感而銘曰

何癸酉歸於姚而庚戌歸於錢也硤亦不知其然也蓋見我

成名者已三十有九年也 載八十三歲

寶澤堂硤銘

筆如神役化工譬龍渴之求飲俄雲黑以景從

明沈少保公家硤銘 并序

硤之來云是東城明沈少保家故物銘曰

青門小隱快雪堂前圖書敬挹二百餘年



癸巳批本硯銘

壬申同年江甯秦狀元大士鑑泉辛卯琢此硯以贈秀水錢

載庚戌載八十三歲銘曰

憶故人兮若太倉邵嗣宗蔚田華亭范棫士芄野商邱籍紀復亨心齋宛平張模元禮皆故人兮三十又九年其存者有幾人兮

溫州華嚴尼寺巖石硯銘 并序

溫州華嚴尼寺巖石襄陽漫士云校理石揚休所觀羲之硯乃此石銘曰

右軍書不可再右軍硯今安在祇有華嚴巖彷彿得其槩誰藏諸瘞石載

癸卯欽州馮編修所詒硯銘 并序

水巖之璞匠琢之以佐吾師畫書詩硯奉瘞石師并銘門人

馮敏昌今銘曰

人之學先德後藝藝者六藝翰墨又其次

秦瓦頭硯銘 瓦頭四字長生無極

是羽陽非甘泉非未央

又

老子長生蓬萊無極瘦硬通神相斯筆力

漢瓦硯銘

何年瓦某土出齋之硯品居一旦以供所須今無庭珪墨諸葛筆

宋製南唐綠石井硯銘 并序

棟理宗時宗正少卿楊先生學本周程所著有崇道集平文



集必硯之曾爲用也故刻名於左載得寶之銘曰  
如掘井既九仞必及泉如一簣者之進

永安湖樓讀書硯銘并序

乾隆五十六年歲次辛亥銘曰

北湖南湖渺渺海灘海潮江潮隱隱越山皆直吾錢先人丙  
舍樓載也講習諷詠松雲閒今老矣徒撫闌

小影硯銘

縱浪大化不喜不懼吾不知歲云暮

寶澤堂洮石硯銘

眾妙皆道惟善以爲寶

宋製大款石硯銘并序

秀水錢載得此硯於明項襄毅公宅東書灘不記其幾十年

矣銘曰

周旋於我久六甲忽而周今乃以自警嘉禾郡西陬真定梁氏秋碧堂法

書第五卷蔡端明詩稟有嘉禾郡偶書之題

宋澄泥硯銘

著墨如油宋之絳縣唐之虢州

澄泥新琢硯微凹試墨頻添萼與苞坐過重三好時節雙輪

卻未碾青郊

靜餘翻自愛矜持小院鉤簾夕照時何似硬黃臨舊帖正裁  
矮本畫烏絲

右詩乾隆丁丑春琢此硯時所作辛亥仲秋錄此刻於背於  
是載年八十四歲三十有五年矣

范給諫硯銘并序



同年范芑野給諫癸未歲贈我蘇州褐黃石硯乾隆己丑七月廿三日秀水錢載記於宣南坊齋

范給諫之歸道山也已丑四月十三日夫是以有前行月日之記也若不明白之則觀者何由知此月日之心辛亥八十四歲載記

良工鑄年復年嘉謨乃頌雙龍泉

池琢劍二

北壁石硯銘 并序

南宋葉樾交叔云北壁石蓋泉生石中則潤可知矣此北壁石也銘曰

潤也玉潤者德知其白守其黑

晉製長硯銘

非宋非唐蓋晉製乾隆秀水錢載記辛亥八十有四歲

中秋硯銘 并序

其來也其時也秀水八十四老人  
高樓多暇最團圓夜

風字硯銘

四十五日一風十二月律之從洋洋乎八風 辛亥

紫雲硯銘 并序

本朝張文敏公題曰紫雲  
非硯甄是城甄樓攻媿云古人燒甄堅於石今以製硯豈不  
如石堅顧其墮城而登我几席也孰使然孰使然

退翁硯銘 并序

皇十一子庚戌題錢載蘅石齋詩集二首其前首云香山合  
有新排卷海嶽今非未退翁蓋即取於白公新排十五卷詩



成米老華髮蒼顏未退翁之句辛亥名此唐式硯曰退翁尚  
有合於今非之義  
不飢不寒隨適而安

端友硯銘

何論青州一絳州次落落端州英敬哉良友遺

快雪硯銘

右邊篆玉磬堂左邊行楷與墨為入玉靈之石與水為出陰  
鑑之液懿矣茲石君子之側匪以玩物惟以觀德隆慶丁卯  
三月望日楊文敏刻用蘇銘以銘故曰刻耳之石本作之食  
載今銘於快雪堂中曰  
宋製而明銘也銘則隆慶元年之春三今惠然來我之寒廳  
也石交輩視如兄弟樂且耽

項墨林先生硯銘

得之浚城河者之手銘曰  
宋製雖損猶可藏暴書亭集詩云天籟圖書今已盡顧其所  
收晉唐宋元明墨蹟乾隆戊辰載館京師皆經手敘次刻帖  
內府 三希堂

頤庵硯銘

竊取朱子詩集傳義銘曰  
以左以右君子哉宜君子哉有

宋何文定公北山先生硯銘

左邊刻直方而正厚重而堅基九字明唐荆川先生嘗藏之  
者其贈諡誥云生無爵者死無諡此僅可施於常人名弗著  
而美弗彰是用特加於君子先生不官而諡王魯齋先生狀



所云爵位雖未稱未嘗無節惠之賜也錢載得之銘曰  
先生研究考亭之遺書不多著述而皆曰發揮者其所著之  
書今已閱春秋五百餘寶諸寶諸

青花唐硯銘

康熙戊子錢載乾隆辛亥所得青花唐式永保無忒

黃葉硯銘

舊在洲錢村莊今爲穉石所藏

九豐堂硯銘

城南丙舍樂何如永豐鄉九曲水乾隆五十七年梅花時硯  
也從游八十五歲穉石子

聚奎堂分校界尺銘

丁丑三月二十日

分而分之非爲短也寸而寸之亦未足長也惟長短毋必隨

之以量也

墨几銘

并序

玉山灘石可安墨鋌題作几而銘之曰

黃如玉冰溪石守其黑知其白筆牀近研山依待水滴無是  
非

芝石座銘

并序

乾隆己卯奉

命典廣西試道黃陂拾此於過渡之溪沙中題曰芝石曾有  
詩蓋形似也已酉載八十有二歲矣復銘其座曰  
雖卵石亦可寶識不忘且娛老

壺銘

盛酒之壺張子贈吾一醜欲罄再醜欲無吾其醉乎其不醉



乎巢公匏尊子先贈之小如秋葉洪飲曷宜嗚呼太虛明月  
寓也非卮疇怒醉人多言失德中流一壺壺量惟則

短筇銘

惟君子秉陽剛之德兮而行止則時其遇變將百折兮可失  
所據而中摧先生之在野春秋富兮弗皇皇乎大道其安歸  
又

澈上峯青九十九維子之敖兮不我後

纒餘杖銘

泊艣山老鴉亂拾得之半已纒月微風刮雪殘道滑非君其  
能度柳橋轉徐灣望北湖之樓而還倚壁少休拭而燭之梅  
枝梅枝嗚呼死灰君溼灰吾徐徐君于于蓋琴一笛一而  
三矣天平人乎

盤山筇銘

己丑扈

蹕于京之東于春之三乙未重逢上天成寺轉入萬松度西  
東甘澗山杏未紅踰嶺入古中盤不敢叩少林鐘行帳夜雨  
五峯洗容曉上千像寺歸而夕春又明日探幽躋勝過雲淨  
寺東竺庵下上方寺上雲罩寺登挂月峯禮定光塔騁望北  
口山海東風峯翔若龍下盤谷寺盤道百折而還皆攜此筇  
筇兮筇兮受

恩竊祿歲六十八杖家稱翁其遂攜爾以誇於家山叢叢月  
十二日姑志游蹤以當題名於盤之中

藤筇銘

己亥九月登廬山緣瀑布落處上黃石巖望雙劍峯徧歷三



峽諸勝繁爾之力能也庚子三月登華山亦攜爾至青柯坪望千尺幢不復上惟予之力不能也是歲至西鎮吳山而登入劔門度萬里橋出古北口歷塞山復至於金陵攝山而登癸卯十一月歸來又二年而余七十有八歲蹒跚莫勝矣葉落霜零乃爲爾銘是老友也敬之敬之且久也所不如其壽也明年丙午攜爾以徜徉乎海上青峯九十有九毋輕其培塿也

九曲裹杖銘

永豐之鄉有交贈吾維持維持亦惟蚤圖

介亭鳩筇銘

井序

故人陳子所手製介亭其自號也銘以示余憶之在乙丑丙寅聞其孫達君載從孫女婿也甲午奉

命典試江西請假省墓至海鹽持以相贈今又十二年矣復銘曰

隻鳩飛飛近東海勝短僮扶行不殆題而藏之丙午錢載



稗石齋文集卷第十八

賦

顧渚山茶芽賦

秀水 錢 載 坤 一

天無茶星此有茶山蠟茶不貴草茶盛焉昔者桑苧實隱茗  
溪作經品第以冠浙西其山秀出長城名因夫槩石嶽嶽頂  
顛土隆隆腹背翠莖翠葉是宜夕陽朝陽所在吉祥數畝尤  
佳希范半園今廢峽明月以相連澗紫花而不礙爰抽眞筍  
最號靈芽歷包貢於唐宋信南方之木嘉祭牲帛兮泉發金  
沙蔭杉松兮堂開木瓜必社前火前而雨前兮趁啟蟄之雷  
車夔一槍一旗而兩旗兮孕先春之露華白於齒兮紫者上  
邪綠垂腳兮陋彼蝦蟇於是密藏裏之香蕝遠寄盛以青紗



天不雨而晶山無雲而曉霧碧猶濛日紅未杲值輕寒兮何  
鮮設暴暗兮則老村中管亦名籃林裏女皆隨媪忌手漬以  
指揉妙用甲而斷爪丁甯帶溼將歸午景芴檐催造戒過火  
過宿兮塵昏異作餅作團兮俗惱曰惟散則存真蓋不蒸而  
就燥況今官場盡革園客無驚溪多風雨臺近清明訪甫里  
於桑塢眺華陽之桃城吟樂天洞庭山腳詩句考刺史二十  
八人題名憶寶子龍坡險面與樊川蠻權歌聲龔老沙壺自  
潔吳生資琰初擎酒邊人瘦飯後禪清醅酌兮谷蘭之含蘂  
薰微兮江梅之吐英詎花前對景而嘗任竹下忘言而煮他  
山性寒茲獨溫蚤摘味甘晚多苦然則非無嗜者奚慮毀哉  
抑惟膏薪之誤於僮婢弗若玉屑之翳乎蒿萊蔡君謨云處  
之得地則能盡其材

小庭勺藥賦

宣南坊瘳石齋幾片香風醱醱落逕一簾細雨苔蘚侵階徒  
知閨值今年桐添葉更其柰節過五日榴未花皆獨是藥苗  
當軒鬱茂一叢則深根厚土去歲之春一叢則小墩新芽清  
明以後於是舊栽者苞足矣而辦待舒乍買者蘂纖矣而花  
難就起我早步於庭靜挹梢頭之露遠聞檐上之聲出巷呼  
來恰壓一肩紅白給錢畱取穠敷數本分明爰規兩隙之餘  
自鋤其地遂覺滿前之盛相說以情所渴泉滋所妨日杲亟  
轉轆轤頻傳栲栳何意驚雷送點霑濡似助壠培頻令曉砌  
凝煙披拂不生懊惱已開者綽綽將開兮苒苒幸少承夫長  
養毋或昧於從容繭栗參差猶讓黃楊復短釵葶旖旎奚多  
姚魏偏工蓋惟託於物情卽而離感於物情隱而見只如焚



尾三叢那必龍興四院詩無杜牧冶游漫說江城譜有王觀  
題品任誇淮甸明歲佳辰儻移此居後來君子又愛爾廬酣  
春定其催吐浩態倍以盈除繾綣回思諒不辱毀傷之偶丁  
甯一往願無忘封殖之初重爲歌曰  
維情攸寄莫攬厥端亦私是護匪曠是觀蔥蒨豐臺穠芳不  
寒盍云騎馬以出右安

鶯嘯

上林賦以上林春曉流鶯百轉爲韻

雨水兮乍陰乍晴桃華兮吐萼含英是爲卯月之候而倉庚  
其鳴比燕之喃喃語圓難學非蝶之栩栩夢淺欲驚自關以  
東自關以西多有遷喬之侶枝高則拋枝低則立亦名出谷  
之鶯鳥豈能言鶯唯曰嘯如工子夜之歌每值春風之扇旣  
往復兮閒關又緝蠻兮婉變聽之則鼓吹撩詩擬之則宮商

成片使其集幽墅度深院動清聆邀素盼亦足以香徑司花  
金衣作傳乃乘陽而梳羽飛回太液之洲遂赴節而引吭響  
近未央之殿溯惟漢室聿有上林奚煩援古實用徵今懿我  
聖人之文囿佳哉灌木之芳禽長養風舒杏繡早攢宮纈霏  
微露潤柳鶯初覆隄陰爰耀耀以偕來屢試穿條之修翅輒  
咬咬以自得頻傳隔葉之好音蓋茂對元游  
併宇而恬棲藉說

皇心時則啟明星耿蔚藍天曉玉樓之色正瞳隴金闕之香  
猶縹緲月痕澹處井轉轆轤鴉影寒餘園開窈窕似聞恰恰  
傍長樂以情移旋覺悵悵徹建章而聲遶喚將雛起翩入煙  
流一點忽衝翠塢數般徐放珠喉諒嘉耦之攸宜亦琴和而  
瑟好更新知之觀止俄此倡而彼酬錫擔遙賡嘹唳也酣簫



孔花鈴靜苔玲瓏還透簾鉤方嬉朝靄之朝已戀夕陽之夕  
過朱戶兮何啞咤以隻雙向綠窗兮太丁甯於千百惟性慧  
以絃調勿身輕於梭擲冥冥紅紫相呼隨綵仗之雍容簇簇  
亭臺竝坐見瑤峯之婉孌固知時當其泰物被其仁苑真得  
地鳥亦逢辰箇箇催暄一百五日將至聲聲送喜三十六宮  
皆春警之感發生於

醜化效才藝於俊民然而毋倚靈腔或睽微尚巧簧傲兮徒  
識曲其云何柔舌箴兮抑投機而貴當矧容與乎青韶復因  
依乎崑閬雖鳳皇之弗若只安巢於五色雲邊庶鶻鳩之相  
於長報曙於萬年枝上

荷珠賦

以風來水面翠  
蓋擎珠爲韻

曉靄澄青溼雲擁翠恍回合浦之光徧撒華池之次田田未

采俄承受以明璣顆顆誰投莫蕩搖乎涼吹雖隨風而聚散  
渺爾無心不與月以盈虧適然如意碧圓自潔體以淨而相  
涵點滴同珍機以虛而恐墜方夫得露是卽爲珠葉沆瀣以  
微積中停勻而漸麤玉女盆盛皎若剖來蟲腹仙人掌捧端  
非將下羊須柄柄休敲仰一規以細綴纍纍欲貫灑萬暈於  
平鋪驟雨初飛跳珠更美颯疎響以徐生溜圓光而不止香  
氣逼闌干直上拋擲玲瓏紅衣遮徑寸低藏迷離尺咫回旋  
勢卻流輝炫動金沙索落聲驚迸串傾還淥水且也高猶濺  
浪亂不關風浴鳥翩翾乍帶波而下上戲魚撥刺倏吹沫以  
西東凡漬水之偶託必團珠而皆融直無脛至前熒熒雪瀨  
真與川增媚熠熠煙叢浩歌移畫鷁於銀塘似逢蜚戶倒影  
浸采蟾於碧漢疑入鮫宮爾其小大何拘淺深不街玳瑁溪



心玢瑀江面足使緯蕭之子澹泊相遭詎令交甫之儔徘徊  
有眷而況植仙洲獻

瑤殿備冥揆超褻玩羅英非濁水願結佩於織裳發秀定璇  
源冀攢星於華扇觀物之象寓道之精披柳綫以翻翻誠滿  
則溢照芡盤而炯炯葆和於平得一者清寫  
天心之靜寄執中也允喻

聖性之明瑩又奚僅求淵而暫出覆沼而常擎抑是含滋尤  
堪呈繪暢蓼蕭之既渥其澤於胥侗溫玉之不雕惟馨斯最  
故別收至寶於珠囊而特錫嘉名於荷蓋試掬初陽瑟瑟幾  
曾銜以靈蛇看張秋影亭亭或亦巢夫神蔡蜻蜓蘸屢瀉瀨  
衝纔有情兮俱化無著兮本來薏苡屏車中祇覺芳菲在目  
芙蓉吟木末敢云璀璨盈懷竊嗣音乎居易以奏賦於

蓬萊

既醉備五福賦以君子萬年介  
爾昭明為韻

德者福之所基福者德之所屆試觀於詩陳德瑞願成王之  
膺而居洵合於書演福疇為武王所受而拜爰紬蘇軾之文  
適廣鄭箋之派蓋夫既醉之言飽德於曾孫也固上荅行葦  
之恩而遞申景福之介其言曰君子萬年此何以然惟五福  
之嚮用必一壽以尊先壽則諸福可漸致壽則其天為獨全  
夫是以初則云再則云永蘄多福至于三至于四祇頌萬年  
壽維亟葆富亦勤招天之祿而既被君之福以方邀家累千  
金卿士之鴻聲已茂賦均四海帝王之盛軌彌昭胥川嶽之  
貢珍是適是總況升恆之日月匪夕匪朝富與壽以駢臻室  
與家其懋建譬彼宮中之巷籟肅如宵曾何意外之虞風從



若券念綢繆牖戶曉音畱制作三千迺灑澗東西誕保奠河  
山十萬斯康甯而無艱又公尸之至願凡茲福集皆由德生  
福非德兮曷繼德偕福兮相程我萬年之君子夔毓粹而含  
英極光輝而盛大自和洽而精瑩故壽富康甯而必曰攸好  
德抑昭明有融而不僅曰昭明且也單厚多益天保亦云必  
業積於悠久乃譽隆乎華勳繁其爲高也繁其爲朗也渺超  
塵而特上豁澄照而不焚全歸之理順其正景命之附格乎  
旻於是洪範之五福備而益欽斂錫之大君矧夫藹藹雖  
釐爾女士翼翼繇繇從以孫子祇此殫誠敬以事其宗廟孝  
克承庥因之篤禮文以燕我父兄慈能受祉而天下安之爲  
當然而嘏辭稱之曷有已則又豈僅五福哉蓋萬福其攸同  
矣懿惟我

皇綏福履兮孝啟慈源虔大祀兮煦嫗布濩歌樂只兮  
萬壽無疆軼周之美兮諸福方來爛盈視兮維德之全有則  
似兮握符衍慶永錫爾兮建極保極繇繇禧其肇始兮

知時草賦

以靈卉仙根泰西來貢爲韻

御製知時草詩序曰西洋有草名僧息底幹譯漢音爲知時也其貢使攜種以至歷夏秋而榮在京西洋諸臣因以進焉以手撫之則眠踰刻而起花葉皆然其起眠之候在午前爲時五分午後爲時十分輒以成詩用備羣芳一種

際中天之景運挹瑞草於

堯庭超莫莢之開落僅晦朔以虧盈惟一日十二時能時時  
以偃仰繁一本百千葉信葉葉之忪惺

聖德洽扶輿妙上下之合撰瑤英涵慧識通陰陽以昭靈維  
海外之所鍾列

墀閒而有韓人來天北獻花豈曰無因貢自泰西問譯不知



其幾呈治象於山川納珍姿於包篚貯以黃瓷之斗比藝蘭  
於上林類於綠玉之莖獲依雲乎羣卉爾其柔枝裊露纖萼  
凝煙色只恆春異周模之又元又白形方叶畧同漢柳之三  
起三眠手以披之警高低之輕赴心乎寫矣恰正側之俄傳  
既宛轉以投機欲止則止乃續繙而逞態疑仙而仙矧夫銅  
壺遞響璇館徐暄葉乍拂於午前則先一刻而已標其穎葉  
重收於午後則緩半刻而猶蔭其根順圭測以彰明初弗矯  
揉其本性喻烏翔而協應尤難斟酌於無言日中之甄影平  
分譬調六律而六呂草際之風光旋動實關二曜與一元且  
其几案堪羅歲蕤似畫亭亭布翠山樓攢而夏靄霏瑣瑣舒  
香園菊釘而秋陽曬玲瓏簾近或月上而還敲匝花當非  
雨垂而自拜懿乎植物曲肖天苞允矣知時方逢

道泰向使萬瀛蒞伏域西叢野蔓守荒蹊又安得荷

萬年之

睿藻拈六韻以

親題肇

錫嘉名校大衍之著而差儕其品目載濡翠墨冠羣芳之譜  
而特繪其端倪三靈所噓喻二氣所胚胎庶醴甘兮迭漑謂  
芝秀兮初栽

仁周萬彙

化被九垓斯情淡乎無情匪乘脛而自至亦寶歸於不寶若  
附翼以俱來臣拜手稽首敬爲歌曰

皇心崇效時孚眾兮厥草圖瑞遠人貢兮鯨波鍼路東風送  
兮升於



瑣臺娛清供兮其昂其俛刻漏中兮應手協時不用之用兮  
誕播

奎章元靈洞兮臣心小草知時以作頌兮

擇石齋文集卷第十八終

擇石齋文集卷第十九

秀水 錢載 坤一

約

益集約

先儒講學有會載無學者也勉合同志爲講論經史之會釋  
文考道由下而上交相謙受以勸以規列有約言如左  
是集專會講經史不作詩文作詩文當別會

工夫初起經義未熟先專看經俟一二經通習後逐漸兼看  
諸史如其人卽有餘力兼之宜先合看史漢

看經先同看一經日積月累挨次徧習看史同

看經之法不當豫立在人自得淺深會講日淺深眾見誰弗  
惕然有進看史同



經看註疏合參

御纂四經三禮未有頒行戴記且合參陳氏集說有能博涉經解諸書者量力爲之

史看正史法當次第看下其溫公通鑑朱子綱目及諸雜史人自留意儻會講正功畢有能兼及者人敬聽焉

經史之學無有窮盡今日剖析義理貫穿典故大略先通覽一周乃可積歲精深

講經法或挨講或抽講不豫定若抽講當序齒向一人輪抽人或抽一二條三四條多不過十條輪抽講徧復各掩書抽問人止一二條亦序齒向一人輪抽徧如承問者不能對則條罰一籌

講史法抽講與經同或遇當挨講處臨講定亦抽問罰同

資稟敏鈍工夫閒忙焉能畫一平日看書豈得較多少大約少至每日每書三葉而止會講時法宜按日計葉按書計葉如不能每日每書三葉者量罰其甚廢學者罰二十籌若實有他務曠功告以故

平日看經史當有劄記并論說之文會講時望出正同人多少隨意

平時有所疑者亦當劄記會講時各乘閒互問

講期或一月一舉二月一舉三月一舉蓋以同人行處不定總以俱集里中卽先數日具柬訂期當各攜其所習之書來雖疾風甚雨大寒暑無阻

講地序齒輪值

講規如一室內就中偏左近前楹安一几講者專席側坐右



鄉同人序齒左右分席坐靜聽亦隨地之宜至抽問時可不  
必專席

臨講時共一揖輪講畢復一揖始行掩書抽問徧將散復一  
揖

會講斷非終日可了當屏除一切人人徧講或二日三四日  
始散卽多日不拘

會日黎明必造各攜寢具

會日朝粥午飯夜飯不設酒飯以三簋爲則人日以銀五分  
付值會之家

罰籌一籌十文二十籌止貯付後會用

初集僅七人慮此事之無所成就未敢徧邀同學或從茲廣  
益並得蒙先生長者入集賜教地無遠近敬俟方來

入集者講不在集來聽者長者客席上坐幼者下坐或漸致  
多人宿否飯否亦隨地之宜

講時尊客之來聽者告去主人出席送止講室階下

是集規模初定尙當隨時增修要於可久

集之規則姓氏及筆札之類立簿每集登記

右共二十五條

乾隆九年十月初三日錢載約

募疏

重修泰安府儒學募疏

雍正十有三年升泰安州爲泰安府改州學爲府學維州學  
之建在宋開寶閒而初設之泰安縣未建學也其春秋丁祭  
及諸生入學巹皆於府學共之乾隆四十有一年五月載蒙



恩簡視山東學政十月科試泰安府至之明日恭謁

聖廟則見殿廡傾積古柏蒼然斷垣高下 崇聖祠半立雨

淋日炙中於是張布幔於明倫堂宿莽之基宣讀

聖諭進諸生講說媿恧乃不可已仰惟

聖天子造士興賢如此其至而泰安顧以廢且不治者承之

乎時則知府事富君以今年八月量移泰安相見之次方謀

所以新之者夫 朝廷設守令凡所興作皆蒞斯土者之所

當先事而不可以徒俟之斯土之人況其於學校乎泰安七

屬則七州縣人之心其不特入府學為諸生者固莫不重修

是望惟恐其後也然而廢之愈久者治愈難則泰安府學之

修幾於重建矣以故費鉅而莫之舉載謹捐養廉百金為之

書簿以募敬告地方長官紳士各視力而輸之尙其沛然雲

集如早之雨若夫重修規制 大成殿東西兩廡 崇聖祠

明倫堂東西兩齋外而戟門櫺星門旁而各宦鄉賢忠義節

孝諸祠凡舊所有者一新之無事增拓富君清身率下克總

其成猶賴董斯役者之程功切實以敬答闔郡歷久甚難而

又期於必可久之心幸甚幸甚乾隆四十有一年十月十四

日提督山東學政內閣學士兼禮部侍郎錢載謹疏

普濟堂募疏

嘉興府城東門外角里街新立普濟堂一區買大宅一所基

十三畝現在修理蓋仰體

聖朝政教於萬分之一盡心盡力於養生喪死之事皆里中

諸君子立其議者襄其役者同心同力以行之真所謂吉祥

善事已載方曰擊其始夫善作者必求其善成竊慮諸君子



志則大矣而其力必有所難繼則如誠心募助以求惟力是視其亦事之可行者爰為疏明其始敬告於好善樂施仁人君子俯加體察其贊其成易曰積善之家必有餘慶書曰作善降之百祥歐陽文忠公於瀧岡阡表申明斯理謂為善無不報而遲速有時此理之常也然又必言賜爵受封顯榮褒大實有三朝之錫命蓋天道福善經書遞傳皆必言及於所報矣今普濟之堂尙未成則自然必其成普濟之事尙未行則自然必其行戴記曰相觀而善之謂摩載不敢瑣陳瀆聽請舉范文正公所錄後周竇諫議事且并錄文正公家義田記以備觀摩之采諫議故里 京師西九十里閒有竇店即其地也馮道贈詩云燕山竇十郎教子有義方王伯厚先生三字經引之竇燕山有義方即其事也且在義田記云初公

之未貴顯嘗有志於是而力未逮者二十年安知非公當日觀摩於竇諫議之事而於別集一再錄之者乎顧竇氏所行一人獨行之而及於眾人范氏所行一身獨行之而及於一族范氏義莊蓋自宋迄今不廢今普濟堂之視竇氏范氏所行則豈止於十倍廣大也哉所望仁人君子之有以必成之而有以必行之矣夫為善誠難為善誠不可多觀歷觀古籍天之待為善之人豈不深且至哉是以懍懍然疏明其頭緒如右若夫議行之規條及立碑以記樂助之數目姓氏在事者自必開列棗刻以示永久而敬覆於仁人君子焉

告示

廣西鄉試告示

為曉諭事竊惟 國家設科取士務在得人我



皇上敷文重道廣化興賢

聖心俯察幽遐至爲周密乾隆二十一年丙子冬二十二年丁丑春夏疊奉

諭旨申嚴磨勘之例因精詳改定鄉會試命題之法第一場書文三篇性理論一篇第二場經文四篇五言八韻詩一首第三場策五道務期覈實拔真並

廩念邊省士子於聲韻未盡諧協俟其歲月涵濡漸臻淹雅今已卯科鄉試屆期使者恭奉

恩命典試廣西星馳入境廣西士子仰被聖主教育深恩科制聿新諒皆濯磨益相砥礪山川靈秀應

昌運而起鴻材其爲國風雨爲國棟梁譬諸良田膏澤久霑當必豐穰於是歲且經節鉞重臣之風示培植督學使者之

誨迪賢監司守令之整飭提撕其於應試規條自無待使者之來彋彋申告茲特恭錄乾隆十年欽奉

上諭一道以再爲通諭更節錄乾隆二十三年禮臣議覆酌定磨勘則例一條並綴使者約語七則於後以重相勸戒爾

諸士尚恪體朝廷鄭重賓興之至意凜遵毋忽

一乾隆十年四月初四日奉  
上諭國家設科取士首重者在四書文蓋以六經精微盡於

四子書設非讀書窮理篤志潛心而欲振管揮豪發先聖之義蘊不大相徑庭邪我

皇考有清真雅正之訓朕題貢院詩曰言孔孟言大是難乃古今之通論非一人之臆說也近今士子以科名難倖獲或



故爲艱深語或矜爲俳儷辭爭長角勝風檐鎖院中偶有得  
售彼此倣效爲奪幟爭標良技不知文風曰下文品益卑有  
關國家掄才鉅典非細故也夫古人論文以渾金璞玉不雕  
不琢爲比未有穿鑿支離可以傳世行遠者至於詩賦採藻  
數華雖不免組織渲染然亦必有真氣貫乎其中乃爲佳作  
今於四書文採掇詞華以示淹博不啻與孔孟立言本意相  
去萬里矣先正具在罔識遵從習俗難化職此之故嗣自今  
其令各省督學諸臣時時訓飭鄉會考官加意區擇凡有乖  
於先輩大家理法者擯弃勿錄則詭遇之習可息士風還淳  
朕有厚望焉該部通行曉諭中外知之

一乾隆二十三年禮部議覆酌定磨勘則例一條舊例定前  
場文字以明理會心不媿先程者爲合式後場以出經入史

條對詳明者爲合式如決裂本題不遵傳註引用異教影入  
時事摭入俚言諧語及作全不可解之語並後場空疎五策  
原問十不憶五者隨所犯輕重察參首嚴弊倖次簡瑕疵此  
外字句偶疵不妨寬貸又試藝雷同勦襲及文體不正字句  
可疑者將舉人斥革錯落題目不行改正添注及字句疵蒙  
謬累者罰停會試二科不諳禁例者罰停會試三科行文筆  
誤二三字者罰停會試一科等因遵行在案是向來磨勘之  
法原極簡明內惟筆誤二三字停止會試一科與字句偶疵  
不妨寬貸一條前後互異未昭畫一易啓磨勘官任意輕重  
之弊嗣後請將字句疵謬之卷定爲罰停會試一科其餘無  
心筆誤無關弊竇者應從免議

右所節錄特舉大綱

一四書文篇幅不拘長短詞采不拘濃淡惟以明理不悖謬



近於中道合於常度就諸士平日心志所嚮工夫所到而各盡其一日之長斯卽是矣蓋君子進身之階必以自得之心爲實在慎毋空空然瞻顧於風氣與主司好尚之說爲也至於好奇好異發於膠固僻陋之心胸者孟子云生心害事此豈足當儲用之材必斥不錄

一性理論務須精邃切實況畧刻甚長儘足發摠夙蘊特不可逞臆見以稍違聖道儻其浮混此與雷同勦襲者均弊也豈不重爲前三篇之四書文累邪

一經文近來均以四書文三篇強弩之末不能更著精神於是薄弱空枯僅了門面語者原往往而是此誠與前輩典型漸遠漸失也今我

皇上聖心惟洞鑒此種有名無實之弊於是

特命第二場作經文四篇正所以尊崇經術望專經之士罄抒夙學庶國家旣得藉收真材之用而鄉里講習亦駸駸乎其近古焉今若諸士於二場經文四篇仍不各盡所長僅了門面則其自待已甘于太薄此卽首場書文稍佳亦斷置不錄毋自詒悔

一詩體以和平莊雅爲擅場其用俚俗不典及一切蕭颯字句者斷難合格且詞義必須層次貼切不宜浮混平仄務須諧協毋致失黏對仗卽不甚精工而字義之虛實單雙在所必辨韻雖別栞一紙隨題分給而檢點仍須細心毋致出韻題與詩俱低二格寫起題下有小注幾字當照題紙式寫毋致遺脫至用頌

聖語或該一擡或該兩擡務須於題意切合圓湛一歸穩愜



若題內並無可以用出格三擡語者斷不可多事出格自詒厥咎

一五策宜條對有格局立論須平正通達斷不可騁私說以落偏枯篇幅亦不應太短即不盡記憶了晰亦當據所識知悉心抒寫擡頭處尤宜措詞切合圓愜至若通幅浮混抄襲此固萬無徼倖之理慎之慎之

一行文敬謹恭避

廟諱

御名

至聖先師諱儻微有違式即倖免發貼仍經謄送者究于磨勘閱出斷乎不錄

一雷同勦襲者斷斷不錄其或引用舊語或平時誦習之文

筆機所到適奔赴於腕下此則亦宜善自融化以免他人不謀而合之弊矧今當

功令聿新諸士總宜仰體

皇上教育深心為國求賢至宏極遠且諸士各承祖先積慶其於立身方具有本末何忍以三年一擲妄自菲薄

一誤寫別字斷斷不可即經同考與主司抹出而本生之自干磨勘或仍不免諸士平時歲月甚閒固應留心辨別今臨事工夫亦裕尤宜加意推尋慎遵毋忽

呈

請 旌烈婦吳氏呈

具呈秀水縣人 恩予原品休致禮部左侍郎錢載等為公顓詳憲具奏請 旌烈婦事竊見嘉興協副將寔誠滿洲正



紅旗人本身世管佐領出任福建游擊參將乾隆五十年乙巳升任嘉興協副將至五十六年辛亥病卒官舍寔誠有妾吳氏福建興化貧家之女寔誠任福建時所納也吳氏性格和柔精於鍼綫勤勞無怠事上待下咸得其心故自寔誠母妻以下至于僕婢輩皆稱其賢寔誠臨卒屬其妻曰吳氏年少無子念其平昔賢勞我死後務須擇配善嫁之毋誤其終身吳氏在旁哭泣卽有願從死地下之語時乾隆五十六年三月初二也至四月二十日七終延僧道禮懺畢寔誠妻告吳氏曰今已終七靈匱歸旗將近我欲就浙江爲汝擇配以遵遺命吳氏卽抱寔誠妻之刻號泣曰不願更適於是羣相勸勉吳氏在寔誠棺側慟哭竟夜內外聞者莫不哀慘至二十一日天明哭至失聲而止詎吳氏乘眾朝餐潛入臥房解

繫身孝帶自縊死年二十九歲實乾隆五十六年四月廿一日也於是寔誠之母之妻之子倍加哀感善爲殯斂勢不能攜其匱北行乃權厝於嘉興城外今嘉興人咸稱吳氏爲烈婦此闔府目見耳聞之眞事伏思

皇朝教化深厚重熙累洽我

皇上大聖人萬壽無疆久道化成之盛所以滿洲武職家有如吳氏之賢而烈者此須眉丈夫之所不能而得之於弱女子崇邱詩云邦家之光如烈婦吳氏正所謂邦家之光也若不據實叩顙上聞安得仰荷

朝廷旌表爲此瀝情懇縣主父臺俯察申詳仰求各憲大人據情具奏庶得仰膺

旌表以廣教化以慰烈婦於地下斯實嘉興闔府紳士所稽



首仰禱感激悚惶于無已者也至於恭請

天恩旌表得請之後起高冢立大碑皆嘉興紳士所願辦之事必公議公行至萬安萬穩蓋此烈婦所當采入縣志府志省志上而一統志更上而國史館修地志者所當亟采修國史者所當亟收也否則列女傳一門將何所收采以永光於不朽邪今紳士等公議不在乎高建石坊蓋石坊歷久數百年必坍塌損無遺莫若擇官地之可葬者起高冢立石碑大書題曰

皇清欽旌烈婦嘉興協副將滿洲正紅旗寔誠之妾福建興化吳氏之墓至墓表與題識隨其所有皆立於墓前併置神主擇日送入嘉興府之節孝祠內以永享祀典方爲盡善用是一併具呈明白伏祈詳各憲臺前施行



蕻石齋文集卷第二十一

碑

誥贈通議大夫陸公神道碑銘

乾隆四十有二年

秀水 錢載 坤一

孝聖憲皇后升祔覃恩山東提刑按察使陸燿旣得晉贈其祖考妣晉封其母循例以本身妻室所應得由巡撫上請馳贈其曾祖考通議大夫妣淑人於是其曾祖考生於明崇禎十五年五月初一日卒於

本朝康熙五十年十二月二十三日妣生於崇禎十六年三月初七日卒於康熙六十一年七月十三日以雍正八年月日葬於縣之二十九都最角圩祖墓之次越四十七年得於



其墓立神道碑而請銘於其同年生錢載吳江縣蘆墟鎮之陸在明初世爲農七傳日照然字君亮五子埰元埰元垣元圻元堦元埉元字廣生卽大夫也配吳氏君亮同楊維斗讀書於里之泗洲寺始爲儒至大夫而且讀且賈蘆墟之中亂後隱居村屋數間水田數十畝有投券乞爲僕者予之值而焚其券於書尤熟資治通鑑綱目宋各臣言行錄每夜分闔蓬門瓦鐙熒熒子若婦東西侍爲講說古今奢儉勤惰門祚興衰之理吳淑人率諸婦操作紡織夜而計數或不足訓勵不假顏色以故家範爲蘆墟之所推嗚呼是蓋有其善而無其名者天壤閒不以名驚而卒以名受如陸大夫者幸而蒙賴國家推恩雖遠必及其所以顯晦遲速蓋有其時夫乃益信

夫爲善之不必懼而爲善者之必有後也如大夫其可以爲其鄉之行路者告矣子五銓銘鉉鎰鍾銓累 贈登仕佐郎承德郎中憲大夫通議大夫孫十一銓出者三 瓚麟洲鳳洲瓚國子監生三禮館臚錄議敘山西保德州吏目累贈承德郎中憲大夫通議大夫曾孫十七瓚出者耀其述其先之行誼也皆所聞於虔實府君者虔實瓚字也無溢辭銘曰陸之得姓在周之季在漢曰賈始顯文字魏晉而後蕃衍江東元有琦者作譜敬宗二百六十其支有餘中吳之介乃有蘆墟蘆墟蕭森大夫之廬大夫之壟松颯吹噓大夫之葬耀甫八齡有崇者碑大夫之靈

誥贈通奉大夫提督山東學政內閣學士兼禮部侍郎國子監生錢府君神道碑銘



府君之卒未有狀葬未有銘嘗語其子載曰士既不能自見於當世以及其宗族鄉黨而尠所著述此皆無可上史館者然則他日其何以爲我具行狀求誌銘蓋自康熙戊戌京師歸每油鐙夜坐與我母言范文正公置義田以贍其族人吾願之若成永安湖先塋山水之佳得壙於傍此生足矣我母曰來日薪水之無乃爲此必不遂之願先塋山水先人之德嗚呼載十一歲後常聞此言也乾隆辛酉我母卒竟得卜吉於先塋之次洲航山麓時載求銘於桑先生府君謂汝母之大端不僅於此礱誌石而刻未成載以壬申成進士官翰林辛巳辛卯兩拜

慈壽覃恩府君累贈通奉大夫 日講官起居注詹事府詹事兼翰林院侍讀學士我母朱氏生母陸氏累贈夫人於令

得立神道之碑丁酉

升耐覃恩晉贈通奉大夫提督山東學政內閣學士兼禮部侍郎嗚呼府君之德之有以庇其後人者其必遠矣於是載年七十有一乃謹爲刻碑之辭府君姓錢氏諱焮字穉光又字父三自號邏水散人行六國子監生考州判職海鹽籍府君學舉業於陸堂陸先生講經學於竹垞朱先生所著有自賞集以應本省鄉試不得舉也應順天鄉試嘗出居庸關授讀於張家口外一夕大風雨山水驟至騎馬過大溪天大黑幾落於衝波明日聞關門塞巨石大風雨中飛過大溪者官乃芴鑿關門以出府君之久客京師也不能以有所合於時歸而復應庚子省試乃絕意仕進以安其貧所居回溪草堂秋雨塌老屋數間欣然曰隙地數弓可以種吾菊平生心慈



口直面折人過而其人事後相見極歡蚤起常徧於同居諸  
從之廚還曰舉炊矣而府君之有無一以待於我母夫人草  
堂破書數櫃教其子以瀟灑不羣儻有遠志嘗曰不事家  
人生產學者以治生爲急是二說者宜何從吾蓋不得而兼  
之矣晚而舊朋祖謝葯房之雙扉晝閉課孫以自娛葯房者  
府君讀書處亦以自號也府君生於康熙十五年二月三十  
日卒於乾隆十二年正月初十日享年七十有二我母生於  
康熙十八年三月初五日卒於乾隆六年五月初五日享年  
六十有三嗚呼我母無出腹子以載之六歲失所生也蓋二  
歲卽鞠之鞠之至三十四歲而母卒以所生之不永也母常  
哭之則攜之以哭其年冬府君游京師七歲教就章家讀書  
八歲就彭家讀書望其能力而見其不能力也則爲之呼所

生而淚嗚呼以母之踰久而常然也而以思我所生之賢癸  
巳至戊戌六年也後堂樓下庶母丁氏姊妹之皆隨母東房  
曉起與母汲井春園爲母劬笥天陰未雨必令肩傘提屐以  
就塾大暑自塾歸飯必令藉竹簟於地頃而予之飯大雪之  
夜重門寂然溫書剝果擊庭桂之壓雪攜鐙攜兒以就寢家  
祠忌日一蔬一腐必薦而率之拜我父敬事寡嫂鍾孺人沈  
孺人數十年沈孺人自言若叔者可以爲子兩孺人居牆西  
讀易堂 旌門者也兩孺人憐母憐其子往來提攜稱好則  
母爲之喜外祖母倪孺人止生一女從舅家近在東灣沈孺  
人最善母倪翁無子特愛其女甥三家之遺之果餌常多夜  
紡一鐙均於弟妹不之思此六年一生之樂其後常不得在  
母前矣然歸而時其飢時其寒旣娶婦猶出於母之手嗚呼



母殯在堂我父哭曰辛苦鞠此兒盍少待也然我母之所以教其子者初不屑屑科名雍正乙卯既舉博學宏詞元年丙辰北上母送之草堂目之出門明年被放歸母曰歸何益也貧我自爲之歸何益也然後知未嘗不望其成名生母生於康熙二十五年三月初一日卒於康熙五十二年九月二十一日享年二十有八嗚呼生母初胎子曰鐵官先鞠於我母而痘殤又鞠載也生母之卒樓窗初日我母急呼兒睡醒與之著衣攜過西房令之拜而哭於牀下也卒前一日生母據牀欲吐令於牀前揭銅鑪不能揭母起自揭之也猶記斷乳時攀母之衣夜夢一紅光神跳躍牀前驚唬醒則抱於母之懷洲航之麓府君豫營壽藏乾隆七年五月二十六日葬朱夫人陸氏祔府君之葬載假歸以乾隆十九年十一月十一

日丁氏以乾隆三十九年十二月初七日祔子男三載庶母生莊星前歿也女二適士族長孫世錫戊戌進士改庶吉士母又三歲卽鞠之至九歲辛酉而府君自撫之今孫男六人女二人曾孫男五人女二人洲航山之左萬蒼山府君五世祖考明孝廉魯南府君妣俞孺人陸孺人合葬之墓澗西高書舍人巨源府君妣贈宜人馮氏合葬之墓皆面永安湖今者松楸鬱然相望實惟先德之蔭矣我錢之先大抵篤行在崇禎初先公侍御以諸生伏闕劾魏璫疏云讀聖賢書傳家惟忠孝二字府君沈淪孤特莫可顯先人之緒其他瑣瑣皆非本意所存而丙舍青山內湖外海自謂茗花開日扶杖於稻塍東西樵爨釣童居然以我爲可與之人此何如至樂者



矣則今日立石萬蒼山徑并記先塋尚惟我府君之心其永安哉嗚呼曾祖考御史孚于府君妣宜人黃氏祖考贈通奉大夫提督山東學政內閣學士兼禮部侍郎明孝廉雍頌府君妣贈夫人譚氏考國子監生又鶴府君累贈通奉大夫提督山東學政內閣學士兼禮部侍郎妣陸氏吳氏全氏皆贈夫人墓皆在埧城楊家橋全氏夫人又鶴府君側室實生府君自始祖以來具詳朱先生國子監生又鶴錢君行狀銘曰

先德之承實以艱難惟道之樂惟貧之安婦道于貧艱難尤至勉相其家冀昌其世維我二人先德之承今賴昔貧傳孫及曾告我後人所生之德爾枝曷榮爾本曷植維我所生昊天培之以有錢後永永其思山靜如德湖深如恩我未報恩

吳烈婦碑

皇清待旌烈婦嘉興協副將長白寔誠之妾主亾自縊身殉福建莆田縣吳氏之墓

乾隆五十七年十二月二十日用寔副將家留葬銀三十八兩經秀水縣夏子汝爲手買端平橋杉青閘河北地二分以葬近嘉興府志所載故明萬曆乙未進士吏部員外郎賀燦然所請旌丁烈婦楊氏墓之左

恩予原品休致禮部左侍郎秀水八十五歲錢載謹題立碑



右碑請 旌格於上司批未得爰依顏魯公題名體以  
立敬俟後之有道德能文章者為高愍女之辭若載在  
世必復為請 旌然據所實書敢告采地志者亦足攷  
今并列呈於前以癸丑復請仍不  
得也自記以待後之得請而撰碑

擇石齋文集卷第二十終

擇石齋文集卷第二十一

秀水 錢載 坤一

墓誌銘一

周孝子墓誌銘

德清鄉飲賓周君國璠以雍正二年二月初九日考終後三  
年縣人聞君孝行於有司請於

朝旌其門祀忠孝祠後十七年乾隆甲子載客德清孝子子

文吾來見謀葬乞銘蓋文吾貧也權厝久矣卜地屢不吉過

時不克葬又一年卜地復不吉於是載謹銘俟文吾之卜吉

而葬孝子字美如一字素庵居縣西百寮山下六世祖密博

學高隱父家任母李氏十五歲而父喪其明家故貧乃棄書

走營生以養戊午父病劇體不著牀者四十有二晝夜父以



愈方急時實割臂肉爲糜進己未父母相繼歿不飲酒不茹葷三年禮也其葬廬於墓側風雨呼號終其身忌日必哭泣其舉鄉飲賓也爲康熙五十年正月十五日知縣事唐執玉席阼階上禮終歸祭其廟泣告曰國璠賤不及祿無以養無以祭今茲於禮當處士賢者鄉人許國璠免于惡行我顯考顯妣一鑑之也嗚呼可謂無忝爾所生也已當父歿遺命以兩世未葬既力葬曾祖考妣於方山陽祖考妣於烏鳶山麓從兄某一子流落外縣求之歸爲昏從弟某夭葬之撫其嫠昏嫁其子女嘗之龍游同舟木商黃遺其金拾而追及以還又之宜興遇有負債鬻妻路哭者倒橐金而畀之其人妻得不鬻鄰有費鬻其妻於巨室又亟爲贖之歲戊子水壬寅旱煮粥捐米阜安石橋跨大溪湍急易壞助修者三禮鄉三物

二曰六行若孝子者其有合焉非邪生順治二年七月十四日享年八十元配朱氏生一子殤繼室衛氏後十四年卒子二人雯文吾縣學生女三人孫七人朗行縣學生景行偕行訓行尊行正行曾孫三人嗚呼葬難矣貧而葬尤難之難也世俗惑葬師說陰陽拘忌率常過時文吾豈有是乎然觀於其葬之難以慎孝子之修於躬而遺其後者不愈可思邪其葬也在某原以某年某月某日謹書之銘曰  
設折俎如賓禮也生其鄉歿而祀也維孝子也山窈溪蒼有封若堂孝子子卜永臧

誥贈朝議大夫掌福建道監察御史范公墓誌銘  
公諱甫霑字耕南號芋田姓范氏松江府儒學生以子械士貴



誥贈朝議大夫掌福建道監察御史配王氏贈恭人范氏相傳宋魯公從高宗南渡其後居湖州四安山之大村元末諱謨者始籍華亭至鄉飲賓宏實生公考纘字笏溪勉贈朝議大夫妣莫氏贈恭人子三長卽公也次仁霑文燦俱府學生公生於康熙十一年閏七月二十五日卒於乾隆九年八月十九日年七十有三王恭人歲貢生岷始翁女生於康熙十四年六月二十一日卒於康熙五十六年七月十四日年四十有三今以棫士卒之明年乾隆三十五年正月六日其孤孫錫圭穉圭卽厥考前此二年所卜地金山縣之南荒字圩庵浜起公冢而錄其長者馮氏所具事略請銘嗚呼載與公子棫士爲同年去其考之歿九年去其妣之歿三十有六年而棫士始及第也歲卜地不吉力營葬不克而棫士卒於官

也未一年而棫士之孤奉其祖考妣奉其考妣暨其叔考妣同日窆於斯也嗚呼而載乃能以追副棫士在日無窮之心公外和易而內剛介樂人之善如己善好行其德不求人知善處人骨肉之間而昏嫁喪葬之力不逮者王恭人嘗贊以成之歲大疫施棺無數豫知卒日而自書其器儀於壁蓋聞笏溪翁之閉關著述也讀書至多笏通陰陽術數而亦工於畫人之求之則令製布絮襖無大小以一襖來以一畫去三時之積出而予夫寒者歲以爲常有子如公其可謂無忝者巳子二棫士進士及第翰林院編修歷工科掌印給事中穎士華亭縣儒學生先公卒公之執友中允黃之雋豫爲之誌女二一嫁黃中允子元度一嫁張俊民銘曰士何以貧也任何以貧也而不克葬其親也公平安矣非以



子孝豈以孫賢嗚呼其誰之天有崇三封兄昭弟穆考妣是從嗚呼范氏中失其世譜而我銘其祖

工科掌印給事中范君墓誌銘

松江華亭范君祖年其高祖考從元妣顧氏曾祖考宏充鄉飲賓妣張氏祖考讚國子監生著有四香樓集妣莫氏考甫霑松江府儒學生妣王氏其世有文學而爲善略見爲其考誌嗚呼君之孤先乞銘君考而乞銘君也君生康熙四十九年正月四日其曰祖之生日其年祖之六十祖臥疾久爰命名曰同而字以祖年也八歲喪母二十一歲補金山衛儒學生則更名械士乾隆元年舉於江南時其家蕭條一弟又未昏卒於是游豫章游粵東以養其父甲子自京師奔父喪方卜壤不得吉而夫人張氏當君客游爲貧家婦奉舅鞠弱子

女以病不起子錫圭始十四歲穉圭六歲於是君不再娶

載

家嘉禾松江嘉禾之華亭鄉也而未識君壬申

慈聖六旬萬壽恩科會試同中式

廷對

天子親擢君一甲二名進士及第遂同入翰林兩人相見輒

亦道家事又明年載請假歸葬先考君送之而欷歔自責嗚

呼耕南翁明形家言也而葬其子安敢不慎自時厥後且見

君之卜壤而難其吉也以故非徒無財也丙子改福建道監

察御史充順天鄉試同考官辛巳

慈聖七旬萬壽覃恩得贈父朝議大夫母恭人而請賜贈其

祖父母丙戌轉兵科給事中戊子復充順天鄉試同考官再

轉工科掌印給事中君屢巡城而能其在御史嘗請禁南人

之應順天鄉試而旨直隸籍者丁丑初改科制第二場試五



言八韻詩一首君請官刻韻一紙按號舍以給辛巳會試大學士蔣公請量取薦卷以內閣中書用君請卽再於中量取以國子監學正學錄用皆得 旨行己丑於是君年六十矣元日五更入 朝市門爆竹驚其羸車奔幾覆朝回載過之猶心悸也春寒監糶野寺他日歸語其子穉圭曰我祖庚寅六十初度越十日歿我今踰其日矣先世無大壽我其久在世乎三月下旬病且亟錫圭在廣東以舉人揀發廣東試用知縣而穉圭後於弟前年來省君方肄業太學而女壻胡鼎蓉方試春官皆侍君夔州太守徐良祠部王顯曾知醫皆朝夕視君親朋視君者滿君邸而四月十三日以卒嗚呼祖年不可知而可知豈其數邪自君卜考妣之壤餘二十年也乃以前此二年得吉金山縣之庵浜其法又當以明年葬則吉

而君歿君之孤扶匱歸松江乃以明年正月六日起君考妣冢庵浜維君及夫人實耐左嗚呼可知而不可知豈其數邪君深躋昌黎讀書當先識字之語博通字書兼明醫家形家視緩急及患苦者皆若在己同年御史雲南馬君卒煢發萬里經紀之歸其喪篤厚師門而誘掖後進如將弗及夫人歲貢生霞城翁女女一其壻以故父諡恪靖公勞績 欽賜舉人孫子女皆幼銘曰 詞臣以文匪侈爾文諫臣以言亦敬爾言天衢徘徊矧壽止斯光靈峰泐何不惜之今以有子益見平生從葬旣吉尙後之榮

誥贈朝議大夫工科掌印給事中陳君墓誌銘

乾隆三十八年十月二十九日給諫陳鴻寶母潘太恭人卒



于京師享年七十有八又明年扶櫬歸杭州將合葬于其先大夫星垣君之墓而請銘蓋君以乾隆二十六年七月十四日卒于里年七十有一以卒之又明年八月葬於西湖山後小方井之原而未有銘也歲在辛未

天子南巡至杭州

召試獻詩賦諸生於行宮鴻寶與選賜舉人授內閣中

書舍人由是官於朝三遇

覃恩君

勅封文林郎內閣中書舍人

誥贈奉直大夫內閣侍讀再贈朝議大夫工科掌印給事中

潘氏

勅封孺人

誥封太宜人再封太恭人陳之先宋諫議大夫伯和從高宗南渡居臨安其後遷明州句章城之掌起橋十二傳而諱鳴球者爲明諸生君曾祖也子諱孟顯娶翁氏復居臨安爲仁和人子諱爾亮字敬齋娶周氏蚤卒是爲君考妣以孫鴻寶請得

馳贈妣封方其考之蚤卒也君年十四弟燮十二齡十歲壽七歲一妹尙襁褓詩書之家故貧祖父母又相繼歿歲又饑寡母艱辛孑立乃去而服賈嘗負米數十里外又博求相地之術往來浙東西周恭人亦亟欲爲子議昏而君則謂兩世未葬且諸弟未成立也旣徧歷江山川麓葬其考於西湖之集慶山葬其祖考妣於慈溪之永林廟後方家橋河西舊所嘗居句章城相近也而所以先其諸弟者旣使之皆有衣食



乃遵命受室年三十有四矣嗚呼孝乎惟孝友于兄弟周恭人苦節五十年年踰八十猶得以孫子之既官告於其先君蓋嘗讀其先妣行略而見其十四歲後之心豈徒其文章之能爲足感人已邪君精相地術應人之求惟恐不及以爲切於其父母者猶之我也而尤急於爲人子之貧者然其得疾也以相地故可以知其德意之所存已君諱熹太恭人考諱連城錢塘人有隱德居江干太恭人九歲而喪其母沈氏二十有九歲而來歸雍正元年癸卯十二月也甲辰正月三日未而月周恭人命之曰我之爲陳家婦也難明日爾夫婦生日家政相付矣蓋朝議與太恭人不同庚而同以正月四日生甲辰正月四日以後太恭人之相夫子治貧家幾四十年孝於姑恤同爨叔之羸疾及其嫠昏嫁其子女而姑以釋悲

蓋四十年所實惟恭儉慈惠以有造於陳氏子二鴻寶仁和縣學生歷官工科掌印給事中鴻賓仁和縣學生女子三國子監生汪國賓刑部安徽司郎中沈世燾國子監生錢敏錫其壻也孫子四大椿大樽皆國子監生大楣大有孫女四歲在壬申余交給諫於京師後請於朝議以其季女字我子敏錫余聞朝議之風而未嘗拜於其家太恭人之來京師九年則邱居咫尺稔其賢其合葬也以乾隆四十年某月某日銘曰維周恭人苦節之詒維大夫孝友之承維太恭人克相之勤而其宗以興北高峯陰法華山左我銘其藏而思其南渡之遠祖

朱府君墓誌銘



府君諱修永字懷谷嘉興縣人載之從舅也會祖諱承顯祖諱昌來載勅封文林郎舉鄉飲大賓考諱振康熙己未進士知舒城縣事授文林郎有惠政卒於官祠名宦又祠鄉賢妣凌氏封孺人府君以國子監生累試不得舉考職州佐配沈氏舒城之弟諱拔實生先夫人舒城之居州東灣我家羅城浜相去不半里府君於諸妹中獨賢先夫人而先夫人於媵沈尤相契載六齡喪所生母先大夫客京師先夫人撫教之蒙舅氏府君之恩歲為求塾師送之就塾日常過塾視之而沈孺人數數遺之果餌皆以先夫人撫教之故府君病二日卒雍正八年七月十日也享年五十有九距生康熙十一年十月十八日某年月日葬於縣之北辰字圩祖墓之南時則孤子應桃求銘旌而先夫人命載書之也後二十五年為乾

隆二十年八月九日而沈孺人卒距生康熙十年八月六日年八十有四以某年月日合葬焉則先夫人棄不孝載已十有五年矣嗚呼是歲載請假於家也執事孺人喪次孤子榮桐求誌墓又二十年奉命江西假歸拜先人壟過州東之居既還朝思先夫人思府君思孺人而乃為之誌府君色笑不苟其行於塗也峩峩然遇物謙沖親串多倚之以周急解紛其隨舒城任也上官檄催逋賦三千府君賣己產以墊解而舒城卒新令謂曰民逋之數未銷入交盤冊而徵以還君府君慨然不之諾舒城三子伯季蚤卒為之殯撫其孤凌孺人病湯藥必親者十年郡城之河淤太守屬董役以濬故人齊魯鄭衛之間而心神瘁矣孺人弱齡喪其考諱功尚嘉興



縣學生無子而無當爲後者既年二十歸於朱遽遭舒城喪  
姑老臥床第晨昏惟謹歲迎其母厲氏以養不利沈之所有  
擇族之賢以後之教子無妄交年踰八十猶日問家事鉅細  
舅氏府君之未竟孺人蓋有以成之矣子三惟梅蚤夭應桃  
娶陳氏蚤卒榮桐嘉興府學生娶俞氏女一適國子監生高  
光煒孫二燦曾嗣應桃煥曾蚤卒俱榮桐出孫女二曾孫某  
銘曰  
幼而知恩老徒云我之從舅朱府君州東半宅鄰已分維賢  
後人詩禮勤維賢後人詩禮勤北辰宇圩松柏墳祖考是依  
神所欣老矣老矣媿此文

擇石齋文集卷第二十一

終

擇石齋文集卷第二十二

秀水 錢 載 坤一

墓誌銘二

知夔州府事徐君墓誌銘

徐君守夔州一年而病假歸里己丑三月赴補京師復病僦  
居法源寺者三年壬辰五月引  
見蒙

恩如例補原缺需次矣復病作甲午三月告部假輦歸四月  
三日去其家十數里歿於舟君諱良鄰哉字又次號其先吳  
縣人曾祖雲劬遷婁縣祖考完一考迪生皆贈文林郎內閣  
撰文中書舍人晉贈奉政大夫廣西太平府同知祖妣張氏  
顧氏妣朱氏皆贈孺人晉贈宜人考以布衣篤行重於鄉二



子安國太學生君婁縣儒學生雍正壬子中式江南四十三名舉人榜名觀光後改也乾隆辛酉以考取補內閣中書壬戌充

玉牒館謄錄官乙丑

玉牒成議敘加一級拜文綺白金之

賜戊辰以大學士保舉監督通州裕豐倉辛未

恩詔加一級推升廣西慶遠府同知丙子閏九月蒞任己卯

調太平府同知庚辰三月實授癸未籤升四川夔州府知府

甲申五月引

見越日詣 圓明園請

訓蒙

上垂問

溫諭有加九月蒞任其在廣西丁丑攝河池州連月理舊贖二百餘乘燭吏倦數易必得其情州俗嫁女不及時而宰耕牛知州日面誨以化之暑月行金城江羣虎踞山岡肩輿至而虎去州士盧思捷謁曰公之民始悍繼帖今感矣以公之將去此也其去河池老幼扶攜酒漿二百四十里接於德勝戊寅攝天河縣早爲文禱城隍神雨如注四境有秋壬午攝甯明州甲乙訟田數歲未決甲以賄求曰得之矣明日與乙翁然而士官德他事將以金謝者不敢見邊俸之滿三年癸未巡撫禮爲秀峰書院院長君熟復宋儒之書時文法先輩聲在輦下至是而粵士樂之其在夔州兼權關稅清釐一切夔無書院至則勅建之營佔地牧馬訟數歲不直爭於制府以還民出開縣民之舅誣其弑母擬寘極刑者勞逾一年而



病不可以彊矣君十五歲而喪母泊乎計偕甫入京而布衣  
終於家布衣之教其子也曰爲國家有用之人君體清性慈  
直而廉謙而厚內外二十年餘而其所就止此嗚呼君嘗語  
余學術之達於功名固其命也然而不得謂非有用者矣君  
生康熙四十三年十月二十六日享年七十有一娶同里吳  
氏處士嶠女兩遇

覃恩請貤贈而未受封子二鳳鳴太學生先卒鳳翔太學生  
四庫全書謄錄女二長適同里鴻臚寺序班袁璿子太學生  
四庫全書謄錄秉直次適蘇州元江直隸州知州宋惠綏子  
太學生思德孫子四屏翰耆霖孫女四君之名觀光官內閣  
實工於書及養病僧寮也應人之求得金以給余壬子副浙  
江榜屬同年己卯典廣西鄉試君監試內簾甲申賦詩送之

夔州已丑來京老而益相得也暇輒過之愛其日書不輟小  
楷鍾王行楷董文敏是月春寒忽投筆空中幾絕遂不復書  
行之前日謂曰二年法源未嘗一言失也嗚呼自譽之南不  
能過法源矣嘗謂曰我死子必葬我今鳳翔卜以乙未二月  
十六日葬君青浦三十八保五區三十七圖山字圩祖兆之  
次嗚呼徐之世蓋不得詳以是誌君宦績歲月不略俟其後  
之起而大之者銘曰

君南孫侍子畱我邸計至而奔諾銘以涕先塋昭位匪我葬  
君樹之松檟納則吾文嗚呼大夫其介守節是曰平生庶乎  
豪傑嗚呼大夫城南之寮風晨月夕色泯聲銷嗚呼大夫宰  
木蕭蕭

誥贈中憲大夫尋甸州知州袁公墓誌銘



袁之先諱國度以上家山陰縣治之西小江楊新大橋今祠  
墓具在其族以耕讀爲業公諱灝字毓暉號瀾谷錢塘縣學  
生國度者公會祖也繼室徐氏生子三長諱萬慶公祖也配  
徐氏康熙初始遷杭州以雍正九年合葬於西湖之九曜山  
乾隆四十五年

萬壽覃恩賜贈中憲大夫妣贈恭人考諱必顯妣尹氏生子  
二長卽公次瀚武生有子鎬孫昇庶母周氏生子治六安州  
吏目無子乾隆二十六年

慈壽七旬覃恩賜贈儒林郎翰林院編修妣尹氏贈安人三  
十六年

慈壽八旬覃恩賜贈朝議大夫刑科掌印給事中妣贈恭人  
以四十二年合葬於西湖四眼井之山麓謹按鑿所述行畧

公生康熙二十九年正月二十二日少而績學博瞻宏通事  
其父母以孝聞年三十餘屢躋場屋遵例捐知州職仍南北  
鄉試數次丁卯選雲南尋甸州於是公年五十八歲矣以儒  
爲治勸四民務本安分守法立書院日與諸生講習砥厲尋  
甸人

本朝未有鄉薦者乾隆癸酉科雲南鄉試州之生楊中選領  
解而公之長子鑒亦舉於浙江方戊辰 王師征金川雲南  
貴州綠旗兵俱奉調尋甸當其衝公材旣肅且敏絡繹旁午  
往來民間不知過兵本州奇營兵亦奉撥公自犒於廩給外  
而周其孥民間不知出兵也嘗攝嵩明祿勸二州在官凡四  
年辛未之春會鞫尋甸疑獄有以爲囚當死公以爲不當死  
力持不可忤上官意遂劾公霉爛倉穀被議落職簿錄其家



鑒擗擋奔馳於二年限內完課又二年丙子公歸而丁丑鑒  
中進士選翰林于是公徜徉湖山者七年癸未二月二十二  
日卒享年七十有二元配徐氏生康熙二十九年七月初四  
日卒雍正十三年九月初十日享年四十有六孝于舅姑禮  
接其娣姒族黨有無雖少必相卹居姑喪盡哀力嫁其夫之  
女弟生子一卽鑒蓋十二歲而失其母也嗚呼太君旣嘗教  
其子矣而其子不得母一日養也後鑒官江蘇常鎮道 馳  
贈其外祖父澎中憲大夫母恭人繼室王氏泗水知縣霈之  
女康熙四十八年正月二十五日生於山東官舍年二十九  
來歸時鑒十四歲寒燠飢飽惟母是依其居舅喪也盡誠盡  
敬生子一鈞泗水自錢塘僑居嘉興府城癸未後太君嘗語  
鑒家無一椽安得買宅與舅家近也久之鑒買宅府城秀水

縣報忠埭奉母江南官廨以四十一年三月二十一日卒享  
年六十有七公三膺 恩榮

慈壽七旬覃恩 勅封儒林郎翰林院編修徐氏贈安人王  
氏封安人

慈壽八旬覃恩 誥贈朝議大夫刑科掌印給事中徐氏  
贈恭人王氏封太恭人

升祔覃恩 誥贈中憲大夫徐氏王氏贈恭人茲卜以五十  
四年某月某日合葬於海甯州袁花鎮妙果山之四轉池原  
鑒丁丑出予門率鈞來請銘嗚呼孟子曰不得不可以爲悅  
傷心哉歐陽公瀧岡阡表昔人謂詳書己之勳階官封爵號  
食邑所以著先德之所致朱子先祠焚黃文曰流根之報無  
復後期且葬葦齋先生也慎之又慎矣然則葬固人子大事



而國恩推及尤至重至切哉今載之於袁亦阡表所云列  
其世譜者已鑒以給事中出歷江南江甯布政使鈞辛卯舉  
人候選教諭孫男三宗勳通州運判宗燾貢生朗國子監生  
女六曾孫男五佛喜佛寶佛祚佛佑佛祐銘曰  
袁大夫藏于斯也妙果山四轉池也繁恩榮先德致也用  
鑒官德所自也山陰西湖兮海昌松林柏林兮相望仁心及  
物澤孔長雖去其官吏則良又廿六年刻銘章

國子監生陳君墓誌銘

君姓陳氏桐鄉人也諱大謨字方來號澹園國子監生其先  
世爲河南人高祖守道者字德培慕浙東西山水之佳來遷  
於石門縣橫湖之北明貝瓊有歸石門詩云不待秋風起恩  
恩歸石門蓋石門明初爲崇德縣桐鄉本崇德縣地明宣德

四年析置德培之來遷在宣德析置之後故今子孫爲桐鄉  
人橫湖之北結屋數楹西則臨河南有石橋今里人所稱陳  
家橋也其堂曰耕樂以農桑爲業自號夔南居士配梁碩人  
實佐理焉是爲陳氏遷浙之祖既歿而其子奉其考妣合葬  
於石門地茅蓬之北夫自號曰夔南居士而來遷於浙豈偶  
然也哉君子於此可想見平生曾祖獻廷字旣修號靜村妣  
吳碩人耐葬其考妣墓之次祖宗建字茂林號梅嶺妣沈碩  
人邵碩人以明季避亂遷南門之世潤堂歿而合葬於祖塋  
之東北橋之西考國縉字爾耕號清軒妣魏碩人鍾碩人三  
子君其季也清軒以世潤堂居其伯子常藝命仲子堯文暨  
君遷縣南鳳皇浜之禮耕堂堯文無子君以長子國子監生  
名世爲之後及伯仲之歿亦耐葬祖塋之次蓋茅蓬之北陳



氏之葬三世不必仿周禮墓大夫之法而必有合焉者已清  
軒之傳三支君之子孫其一支也君生于康熙四十三年十  
二月十八日卒于乾隆五十一年八月十三日享年八十有  
三先娶張碩人無所出繼孟碩人今子男二人亮世均世俱  
國子監生孫男十人詩球桐鄉縣儒學生其八人俱業儒今  
墓在河之南橋之北其與張孟兩碩人合葬也卽以其年九  
月二十九日仍不遠于三世之兆域而陳氏之墓之有銘自  
君始夫誌之所重墓之所在也東漢墓誌所重嘗不在文飾  
其平生之言行夫子孫而可立家傳後非其言行有合於善  
者能妄希天道哉茲敘次先墓以誌君之墓此則陳氏之世  
譜也已銘曰  
書曰作善降百祥易曰積善必餘慶誌其葬而誦斯言卜其

後之善必昌茅蓬地兮松柏蒼陳家橋兮河泱泱君之後兮  
昌桐鄉

誥授奉直大夫吏部文選司主事晉贈朝議大夫  
康古汪君墓誌銘

君之歿二十二年矣予今八十四歲乃爲誌墓人生百年何  
予之于朋友一倫流涕無盡也傷哉君家故饒至于君獨貧  
君才早慧讀書最多謂當大有用于世晚甫一第而不壽嗚  
呼君幼通陰陽數術之學孔子罕言命又曰不知命無以爲  
君子孟子謂得之有命孔子曰有命孟子謂得之不得有命  
聖賢輒言命豈有外于君所推之珞珪術邪予于里中君前  
一輩人哭朱明府沛然陳明經向中祝典籍維誥則君之舅  
氏而外舅也同君一輩人則哭王比部又曾萬孝廉光泰君



弟孝廉仲鈔明經又辰此豈予之命也邪自君身後諸郎科第仕宦皆不若君之身艱難今葬之日子男四孫男十七曾孫男四女三女八女五此固君之命然哉君姓汪氏諱孟銷字康古號厚石浙江秀水人先世休甯國初來遷桐鄉曾祖考森桂林府通判戶部江西司郎中誥授中憲大夫有小方壺存橐粵西通載若干卷妣黃氏封恭人本生曾祖考文桂內閣中書四舉鄉飲賓誥封奉直大夫有鷗亭集妣黃氏封宜人祖考繼燦鷗亭次子後于弟森康熙戊子舉人歷官吏科給事中巡視臺灣妣張氏考上墳歷官大理府知府妣祝氏皆誥授奉直大夫封宜人大理四子君其長也大理教子嚴宋儒理學之書皆自授之雍正乙卯爲娶婦卽祝宜人之女姪蓋大理惟及爲家子娶婦其諸子女

皆君子父歿後爲弟昏而嫁其妹者也乾隆元年丙辰君年十六侍母從父官盛京入官京師辛酉母歿君扶匭攜弟歸里卜壤葬母于海鹽山茶花漾之原乙丑大理出守遣家歸丙寅大理卒于官君奔迎匭歸合葬于新阡休甯之汪皆祖唐越國公華遷桐鄉者至君始以進士起家旣官中書謂身已食祿所受產悉以畀兩弟又辰彝銘君之于父母弟妹不能不謂其孝友也桂林裘杼樓藏書甚富皆借鈔于江南故家同里則倦圃曹氏竹垞朱氏予嘗共君言書且無論其聚見卽可矣君之于書豈止見也哉壬戌癸亥甲子閒君及弟仲鈔字豐玉同余于小方壺萬卷之儲豈止觀其大畧丁卯余客京師庚午君與豐玉同舉于鄉而豐玉年未三十以癸酉歿嗚呼才與命相妨蘭摧玉折其奈之何哉自後君爲



瑄操舉子蹭蹬名場中閒支離藥餌者且十年嗚呼讀書之有命也又誰謂不然哉所著古文辭經術金石雜彙未整理其已刻者厚石齋詩集十二卷豐玉桐石草堂集萬孝廉集君序而刻之嗚呼嘗謂吾黨諸子皆不壽其詩之已刻者若王比部丁辛老屋集萬孝廉柘坡集君及弟豐玉集陳明經毓恬匏村集雖莫信其必傳然異日采乾隆閒詩不能舍此數家不收也則其可傳者信在是已君以乾隆庚午舉人壬午春恭遇

聖天子三舉南巡趨赴常州恭進迎

鑾詩龍井見聞錄十

二卷得

旨畱覽

賜緞二匹

召試入選授內閣中書丙戌成進士

仍官中書轉典籍升吏部文選司主事恭遇

慈壽覃恩

誥授奉直大夫後以子如藻官恭遇

萬壽覃恩

誥贈朝議大夫生康熙六十年九月十四日卒

乾隆三十五年閏五月二十八日享年五十君之舌如蓮藥微有痕若將分辨然吾未見有二也其來蓋有自哉君辦事內閣卽充方畧館纂修又

御批通鑑輯覽平定整噶爾方畧

大清一統志皆身兼其

事君約身以儉同儕譏其儉不中禮則固兩失于偏矣君之得于天者未嘗不厚然亦未嘗不薄也使不若加折挫然而稍申之壽則所出入敷布儒者之效豈不遠且大哉元配祝氏秀水內閣典籍候補主事維誥女 誥贈宜人晉贈恭人孝于舅姑動識大體祝自明虛齋先生萃歸田講學輩出聞人女子而有舊家風範若恭人者惜其無年耳生康熙五十



六年十月十八日卒乾隆九年八月十七日年二十八繼室  
金氏仁和乾隆壬戌會狀禮部侍郎姓女 誥封宜人晉封  
太恭人其稱未亡人也二十二年間成就諸子大有造于家  
生雍正八年四月十三日卒乾隆五十六年八月二十四日  
享年六十有二今以乾隆五十七年十一月七日合葬于桐  
鄉縣永新圩之原子四如藻祝氏出乾隆乙未進士翰林院  
編修出守撫州升興泉永道未赴丁繼母憂如洋金氏出乾  
隆庚子 恩科會試第一名 殿試第一甲第一名 賜進  
士及第翰林院修撰 上書房行走為仲鈔後君先以如澈  
後仲鈔殤復以如洋也如潮妾范氏出直隸武清縣丞范氏  
生雍正十三年七月初十日卒乾隆二十六年七月二十八  
日年二十七如淵金氏出嘉興府學生其合葬也元配繼室

妾耐一穴四兆銘曰  
曠野無山兮水流東千秋白日兮長掩封



稗石齋文集卷第二十三

墓誌銘三

盧室管氏墓誌銘

秀水 錢載 坤一

國子司業盧君穀聞母夫人計將奔歸卜葬並營尊甫寅齋先生壽藏而乞同年錢載為妣誌謹按狀姓管氏貴筑人以穀官例贈宜人考遜康熙庚午解元威甯府儒學教授妣馬孺人宜人早失怙母痰疾手足不仁以女侍舉動備得安年十六而嫁盧之先浙江天台明貴州前衛左所百戶藩障始家官所入

本朝代有科仕然尚儒術不事生產又經兵燹舅燦文學遺七歲子而孤姑周太宜人端介益無宿儲或餽之非義不受



洎衰手足亦不仁以婦侍舉動無女婢親潔廁踰太宜人宮  
詹起渭妹歲七十稱觴屋隘葺小山園數楹小山園者文學  
所構依石板寨之小山宜人酒食供匠役則鬻簪珥以繼比  
移居壽辰女賓之來多華飾宜人荆布與接待蓋其于貴富  
之介泊如已先生困諸生念母苦節莫以報宜人勸教子  
苟書種有託不於其身亦孝也嚴冬相與單衣忍凍不輟課  
縫綴炊爨十指盡皸瘃丁卯庚午璐鼓舉于鄉壬申恭遇  
皇太后萬壽恩科璐以明通榜授教職鼓成進士改翰林院  
庶吉士每報錄至念周太宜人不及見諸孫之立涕泗交頤  
癸酉璐補餘慶縣教諭甲戌鼓散館授職檢討欲請假歸覲  
乃勸先生我二人尙未衰兒輩宜奮志庶他日得焚黃告先  
墓君其攜鼓婦入京於是先生至京鼓僦寓蕭然宜人獨力

于家踰五年先生以離鄉久歸叔季方偕侍而鼓婦病且歿  
宜人聞之哀甚詎知終以積勞得疾不起邪自周太宜人後  
家政恪守歲時躬滌祭器饌客手烹飪遇孤寡老病輒量飲  
嘗曰物雖微施于當阨未必無補嗚呼宜人之以貧而造于  
盧者可謂賢而難顧未享鼓一日之養榮封未逮悲夫生于  
康熙四十六年正月二十日卒于乾隆二十五年八月十一  
日其葬以二十六年十月二十五日在鳳皇山子四璐鼓琬  
璿女二長適王楚次許張無瑕子孫八名憲名懋名慧名惠  
名恕名懃名懿名志孫女四銘曰  
安其所難樸而不飾以有子孫母也力歸于斯左壽藏小山  
之家奕葉光

誥封恭人劉母孔氏墓誌銘



鳳臺縣兩舉鄉飲賓康熙乙酉武科解元孔君諱興鈞之女同縣雍正壬子科舉人揀選知縣候選同知 誥授奉政大夫 誥贈朝議大夫刑部貴州清吏司員外郎劉君諱滋善之妻分巡廣東南韶連兵備道松齡刑部貴州清吏司員外郎柏齡之母 誥封宜人晉封恭人是為劉母孔氏壽七十有九歲乾隆三十六年三月初二日卒生康熙三十二年六月初九日朝議之墓在縣來山之原去縣三十餘里松齡柏齡十以明年正月二十六日奉匱合葬焉具狀來請銘孔氏系出東魯恭人幼時鄉飲君授以小戴禮諸篇輒解其義年十九歸朝議忘其家世之豐盛執爨躬汗澣以事其舅姑朝議為獨子既補學官弟子恭人則色養代匱不以分夫子績學之心由是凡所宜于劉氏者五六十年以來率敦朴而近

千古其訓子也嘗曰不矜細行終累大德又嘗曰居家理故治可移于官其處家也女子毋踰閭男子十五以上毋入庭院于歸之數月遭祖姑喪後遭舅喪皆盡禮乾隆乙亥遭姑喪朝議哀毀骨立明年朝議卒于是手營兩葬松楸碑碣使悉如度已卯柏齡官于京迎養于京丙戌松齡自粵入京迎歸其里柏齡亦歸恭人鶴髮融怡一堂四世婦俱名楸女適士族其卒也有孫五男三女曾孫二男嗚呼婦人能明大義而膺多祉如恭人者是可以銘矣銘曰鬱鬱崇岡茲辰壽母耐于幽堂鬱鬱崇岡維壽母之德以翼爾後昌

誥封恭人柴氏墓誌銘

乾隆四十有一年四月初九日宛平分巡南汝光道退圃張



公元配 誥封恭人柴氏卒享年七十有六于是退圃自爲  
之行略其長子模豫卜地于永定門東南南海子東北蕭家  
村將以六月二十九日葬而乞載以銘謹按恭人柴氏浙江  
仁和人曾祖望廣東布政使張公伯祖福建按察使宏俊同  
順治丁亥進士年家也祖考謙御史康熙朝以建言得罪考  
載庸康熙己酉舉人知永平縣事妣張氏恭人行二雍正甲  
辰張公薨于杭明年偕歸京師恭人以不逮事舅姑歲時祭  
祀未嘗不泣下恭人之持故家門戶備歷艱難公既以諸生  
被薦舉蒙

世宗憲皇帝恩分試工部授虞衡司主事是時果親王管工  
部以河工積贖不得銷委兼理都水被劾被罪于通州者二  
年丙辰

### 皇上龍飛蒙

恩起用補刑部主事歷戶部郎中出爲河南南汝光道以商  
城縣事望誤效力軍臺恭人蓋先後共辛苦者四十年教其  
子不姑息中間壬申模成進士張氏自其族祖永祺順治壬  
辰及第至是蓋百年矣恭人少慰而教其孫益力十餘年來  
公以免役歸兩子旣官而歸最幼庶出子上學又一女恭人  
愛之如己出高氏姑有遺女撫之十二年嫁之如女家雖日  
支詘諸孫英英曰上今年曾孫生恭人亦自以爲晚而差得  
聚順去年次子桓赴補四川今年二月 國家平兩金川桓  
以奉解喇嘛入京宿留未發恭人乃疾大作以終子孫曾皆  
奉含斂而前數日其從弟適來又兄子亦在乃有三千里外  
母家子姓嗚呼恭人之所處亨嗇不常而得于天者可謂不



薄非其所積有以自致也邪恭人生于康熙四十年十一月十一日其嫁也二十有三歲以乾隆二十六年

慈壽覃恩膺受 誥命子三模王申進士選庶吉士改官部曹提督廣東學政桓廩貢生重慶府通判庶出者榮孫子七光熙庚寅科舉人光烈中正附學生光然中達光熊光煦孫女八曾孫一曾孫女二嗚呼恭人系出浙西載以年家子誌其葬爲恭人南瞻錢塘增重鄉里銘曰

其亨齋其齋亨五十四年亦既有成涼水河東其藏孔安修林列遙山環

### 張孺人墓誌

朱沛然霖齋君之元配孺人張氏國子監生諱侶劉女母沈孺人兩家世居梧桐鄉稱德門舅拔貢生渭笠先生既歿遠

事姑張孺人王姑水孺人孺人體素羸姑又多疾親湯藥者數載王姑老而性嚴恪孺人婉從儀法旋治兩喪哀瘁邁心疾不能有身乃勸君蓄一婢家故儒百畝之田廢且盡婢不能安也遣去人初疑孺人之妒君既久困諸生賃遷府治之東灣嘗賴孺人女紅之所出以爨時復得賣文金孺人必請所自來又賃遷澎湖之南岸吾徒二三者方落漠自溺于文章造君必數日留吟醉轟然必徹曉而孺人供饌必立辦必潔蓋忘乎君之囊必空也其自處極約君嘗游近地分錢半貫游累月歸而半貫如故然鸞嫁具以趨人急曾不責其償性不事仙佛念君四十無子遂長齋夜輒露禱於斗已酉君以五經舉于鄉明年下第歸孺人復爲置妾費氏居歲餘不舉禱益力漏盡不休轉習鍊養之書動若有悟而心疾作矣



語家人今年冬至殆將死已而一晝夜疾驟劇呼執費手曰  
汝當有子吾不及撫吾子也一淚卒實雍正十年十一月初  
四日嗚呼孺人女子顧賢明而貧而無子而不壽悲夫生康  
熙廿九年正月初六日年四十三繼子某纒而正于位明年  
會試君復下第歸以其冬月日葬于先壟其女弟之夫錢載  
謹爲誌

蘧石齋文集卷第二十三終

蘧石齋文集卷第二十四

墓表

處士張蒿庵墓表

秀水 錢載 坤一

聖朝天地之德之大物物涵煦以生長成遂其閒之以處士  
自見者類如江南之顧絳山西之傅山康熙己未以博學宏  
詞薦而一辭一不至臃腫拳曲之木實霑雨露以遂其山澤  
之生山東濟陽張爾岐蓋其闡然者矣爾岐諱字稷若號蒿  
庵以明諸生入

本朝順治庚寅當貢太學以病不行其病既困乃口授墓誌  
生於萬曆壬子七月二十二日歿于康熙丁巳十二月二十  
八日其所著儀禮鄭註句讀十七卷顧氏謂使朱子見之必



不僅謝監獄之稱許至今江浙間為儀禮之學者稱蒿庵張先生先生之學深于漢儒之經而不沿訓詁遂于宋儒之理而不襲語錄其答論學書云士生今日欲倡正學于天下不必多所著述當以篤志力行為先蓋聞然君子之自得者也惜其學辨五篇僅存辨志一篇然已足以見其學之正其所為文處士前川府君墓表將仕佐郎龍溪府君墓表亾室朱氏權厝志隻字必謹而皆得于經之意夫南豐之作開朱子先其亦何必不近之矣前川府君其祖也諱蘭龍溪府君考也諱行素為石首驛丞曾祖諱信其遠祖諱大倫明初徙自棗強其子孝寬諸生孫瑞源曾孫昭木元孫本碩來孫克敬克明克敬今轉徙山海關外以傭耕克明為農于濟陽年過三十而未娶嗚呼崇禎己卯以石首之罹兵難也欲蹈水死

欲著道士服入山以有母之待養也自抑自制而不敢遂蒿庵者自題其居者也養其母三十四年龍溪墓表云康熙壬子郭孺人以正月十三日歿及門艾尚書諷之仕卒以病自廢教授其鄉里守其道立其言蓋後其母六年以歿嗚呼是則可謂處士也已其他所著易經說略八卷詩經說略五卷夏小正注一卷弟子職注一卷老子說略二卷蒿庵集三卷蒿庵閒話二卷濟陽縣志九卷吳氏儀禮注訂誤一卷春秋傳義未成山東按察使陸燿既立蒿庵書院于濟南而復屬載文以表諸墓嗚呼濟陽人士縣城南二十里荒草寒流杈樞古樹者

大清處士張蒿庵之墓

勅封文林郎魏君墓表



君姓魏氏諱墀吧瞻其字也先世爲諸城人元宏璧以孫官  
贈奉直大夫三子舜謙讓以子官封奉直大夫謙留諸城舜  
讓遷鉅野讓四子其仲德昭三傳曰惟吉子染是爲君高祖  
曾祖紫祖韓考思齊以孫起鳳官贈文林郎君封如之妣  
氏贈封孺人文林七子第五卽君君少而超邁讀書嬰羸疾  
爲國子監生文林之治家善持籌君左右如志文林說之洎  
乎中歲以兄癸巳進士朝知畢節縣到官未及旬歿而萬里  
歸其匱也以兄庚子舉人陞康熙辛丑壬寅連歲大祲父捐  
館舍綜家務里人訟之年且老而任其逋賦落其產爲之償  
也以兄寧縣學生之歿于南鄉以弟相縣學生之年未四十  
暴卒而皆爲之葬也以兄陞之來鄉下車股傷歿于幼小之  
姪家而迎其匱于家也以母年八十自文林謝世十一年中

哭其四子歿承重遠出而力葬爲諸孫先也倫紀之關他無  
所見庸常之極輒亦相忘然則今日之以起鳳請而表其墓  
也爲魏氏言之與爲鉅野之人言之與爲諸城之魏之人言  
之與過其墓而觀者可以思已君生康熙二十七年五月二  
十六日卒乾隆三十五年三月二十日享年八十有三配姚  
氏居簡女克修婦職生康熙二十五年二月初四日卒乾隆  
四十一年正月二十二日享年九十有一子二起鳳壬申  
恩科進士廣信府興安縣知縣沂州府儒學教授起龍曹州  
府儒學生孫四曾孫二其葬于玉山西南祖墓之次以乾隆  
四十一年三月二十九日未有銘

曹先生墓表

維小越一曰三都今紹興府上虞縣之鄉曹先生之故里也



夫以國爲氏其在後漢孝女娥之父盱會稽上虞人也則曹  
叔之苗裔有散居其鄉者矣康熙五十四年乙未載生八歲  
拜先生于嘉興縣治前彭家之塾乾隆五十三年戊申載年  
八十一先生之孫均請表先生之墓而小越之譜莫由攷鳴  
呼載何敢曰不知先生當年苦節不可貞之難先生諱櫛字  
元拱號竹鄰生于康熙二十一年八月初一日高祖考鼎二  
失諱妣蕭氏曾祖考諱當仁妣陳氏皆葬上虞祖考諱明進  
字秀峯三歲喪父九歲喪母二十五歲始遷嘉興業銀工爲  
人朴直而果敢生於故明天啟七年正月十九日卒於  
大清康熙四十五年七月十一日葬嘉興縣胥六都南洙浜  
之原元配顧氏上虞西華人卒年二十二歸葬上虞祖塋生  
子一甫二歲是爲先生之考繼配何氏上虞八字橋人撫子

如己出卒年七十有二合葬南洙浜考諱永甯字漢扶佃儻  
而明敏樂與正人通士游力養父母無違言無戾色卒年四  
十有四配吳氏嘉善吳念珩女孝於翁姑雖貧卹母家之凋  
謝卒年四十有九耐葬南洙浜先生逮事祖考二十五年繼  
祖妣十六年逮事考二十年妣二十八年獨祖妣顧上虞先  
壟遠隔錢塘江常不得歲寒食躬祭埽先生語及祖父之際  
流涕歔歔而不可以止先生少多病以賃彭家之廡也遂師  
于賡唐彭公寒暑夜誦徹五更鄰人闕之無有鐙背誦也彭  
公嘗語人舊家零落僅此一綫彭公冲谿先生輅之後其後  
令諸子轉師先生也十一歲五經通熟十四歲授徒以佐養  
借得左氏傳博求於兩漢以來之文今手鈔本子若孫猶匱  
藏之庚寅補秀水縣學生先是丙戌秀峯翁八十卽世先生



為承重孫免器乃應試是時先生啟塾于彭公甯壽堂之西齋縣治左右人家童子冠者願業儒而為舉子業者咸來從先生而載亦及于門八歲聽講聞先生告學者曰吾言之先後次第如是明日覆講當亦如是也若不記而忘之即明日先問以補之不問而覆講闕必予夏楚矣諸弟子習而安焉早晚答問不倦乙未至戊戌凡四年先生聘田氏未昏而亡兄曰田先生時時來請講習于是日聞陸稼書先生之說後乃知先生所學伊洛之學載年十七亦授徒閭巷先生遷徙無甯居雍正乙卯以後適館于梧桐鄉嘗一至山西歸而病矣乾隆五年十二月十七日先生卒享年五十有九嗚呼先君癸巳游京師先妣朱夫人教載就彭家塾也戊戌先君歸自京師庚子復教載從先生僅一年先生之為學近而約不

驚窮高極遠有歸宿而無汨濫其處于世也寡營守拙無慕乎外而中無所憂蓋以是泊然自得以及終其身其于書也則董文敏郡中嚴氏兄弟擅董書推竹鄰小楷于醫則薛立齋其道若至簡而常以活人閒應人畫扇竹石蕭疎刻印章必曰文三橋蓋藝術兼通而亦藉自給夫人陳氏江南常熟陳挺凡女井曰親操門內蕭然肅然一如先生意指夫人生于康熙二十二年二月十九日後八年七月十八日卒享年六十有五既權厝南洙浜祖塋之次至是卜者曰吉合窆起高墳實五十年十月十五日誌銘未具子三熙昌燕昌烈孟未娶季無子昌燕秀水縣學生俱先後卒孫二均垣均秀水縣學生嗚呼當先生教學時里中之才能而勢力者俯視屑屑七十年以來有問其家無其處者矣而先生之子若孫僅未



絕炊猶然教學豈讀書之道之必有合於天哉夫天道固未嘗有所負於讀書也如我先生可以爲儒而窮者之所法矣先生嘗記秀峯翁語先世明一房諱軒者明正德甲戌進士明五房諱輻者正德丁丑進士攷正德甲戌三甲四十名曹軒丁丑三甲二百二名曹輻皆上虞縣匠籍先生之後之光大也其收族于會稽上虞哉

賜進士出身 誥授資政大夫 恩予原品休致禮部左侍郎門人錢載撰

國子監生張君墓表

國子生海鹽廷相張君初葬某原其子燕昌請其師秀水徵士張庚誌而納諸壙矣既懼其地之莫安體魄也乾隆四十八年遷墓于縣西南黎字五百七號角里山之麓于是去君

之歿廿有六年又四年請余文以表之燕昌曰先府君抱濟世之志而無其遇蘊及物之仁而嗇于力也蓋將以君平生之孝義播諸行路冀無終泯于斯世君諱維斗先世隨宋南渡來嘉興子孫散居馬涇之陽其一則曰大樹村考宗倫始徙縣城之安仁里妣高氏子三君其仲也聰爽而不凡弱冠讀孝經喟然曰家世孝弟力田我其何所以而可立身顯父母邪君之力且不足於服賈然惻隱所流耳目所接貨財不以私其身鄉里事有紛糾輒以理解之頑梗勢力者亦從而折服論說古今廉吏若身親其閒願一掃宿弊安此樂業之人嘗謂司馬公誠積金積書我其無所以遺子孫矣乙亥丙子歲歉所在賑貸君顧其子曰藁饑補乏惟力之能其偶直此第勉行之旬日而民氣自定也嘗贖故家之鬻子飲食之



以至於長而歸之蓋族姻黨友之急時若有不可以少君者而君之家固未嘗有餘也卒年四十有四元配陳氏年三十以儉勤勞瘁卒君感之不再娶今合葬焉子一燕昌海鹽縣優貢生孫開福君嘗種瓜於城東隅遂自號瓜圃張徵士自號瓜田爲大書瓜圃二字以榜於其門歲在戊戌燕昌以貢入太學謁余于宦南坊奉瓜圃之遺像請題因作贊云好善而貧賴于宗黨其圃武原書聲莽蒼灌瓜守瓜自給給人傳經明經析薪負薪嗚呼種德如瓜種瓜及辰松其身高石其心介是子奉像是圖使拜三百年來獨行其儔海上往哲西村西洲嗚呼引蔓維夏結蒂維秋

擇石齋文集卷第二十四

終

擇石齋文集卷第二十五

秀水 錢 載 坤 一

祭文

祖祠告文

孫載六歲失所生鞠于母朱氏父教之學蒙賴祖德晚始一第今官春坊恭遇

崇慶慈宣康惠敦和裕壽純禧恭懿

皇太后萬壽仰荷

皇恩加級追榮其先得 馳贈祖考又鶴府君爲朝議大夫

祖妣陸氏爲恭人繼祖妣吳氏爲恭人生祖妣全氏爲恭人

敬書 誥詞遣曾孫敬錫請主祇受焚黃改題奉祀謹告

洲航山墓焚黃文



男載失養顯考十有六年受顯妣鞠育恩二十有九年自六齡生母見背至于今未有一言之述賴先志遺蔭王申得第今官春坊恭遇

崇慶慈宣康惠敦和裕壽純禧恭懿

皇太后萬壽仰荷

皇恩加級推榮所生得 誥贈我考葯房府君為朝議大夫

妣朱氏為恭人生妣陸氏為恭人謹遣載子為從子措後敬

錫請主祇受改題敬奉

制詞焚黃墓次以告

塢城楊家橋先墓告文

孫載乾隆辛巳恭遇

覃恩得 貤贈榮典告祠祇受嗣是歷官詹事辛卯恭遇

聖母崇慶慈宣康惠敦和裕壽純禧恭懿安祺

皇太后八旬萬壽

天子推恩羣臣復以加級追榮二世得 誥贈祖考又鶴府

君為通奉大夫祖妣陸氏為夫人繼祖妣吳氏為夫人生祖

妣全氏為夫人今歲甲午奉

命典江西鄉試請假十日歸里省墓敬書 制詞焚黃竝改

題神主于祠深維祖德曷任悽愴謹告

洲航山墓告文

男載備官詹事乾隆三十六年辛卯恭遇

聖母崇慶慈宣康惠敦和裕壽純禧恭懿安祺

皇太后八旬萬壽復荷

覃恩加級追榮其先得 誥贈我考葯房府君為通奉大夫



妣朱氏爲夫人生妣陸氏爲夫人今歲甲午奉  
聖主恩典江西鄉試請假十日歸里省墓敬書 制詞焚黃  
竝改題神主於祠伏念男六十有七歲矣康熙癸巳六歲失  
我生母音容不知幸蒙我母夫人鞠育深恩重經癸巳躬祭  
于墓乙亥清明隔十九年乃趨墓下戀松楸之成蔭留明日  
以瞻依十月十三日謹告

先祠告文

載永惟世澤積有由來俾陟朝階迨于今日恭遇

孝聖憲皇后升祔

太廟恩詔仰蒙

皇帝孝思錫類推及

臣先得恭請

誥命馳贈我曾祖考雍

頌府君通奉大夫曾祖妣譚氏夫人復得晉贈我祖考又鶴

府君通奉大夫祖妣陸氏夫人繼祖妣吳氏夫人生祖妣全  
氏夫人復得晉贈我考葯房府君通奉大夫妣朱氏夫人生  
妣陸氏夫人實彰善慶三代榮膺敬以膳黃寄家蠲吉改題  
神主敬告

先墓焚黃文

曾孫男

載

自進士歷館閣既二十有七年莫能一報祖德茲

恭遇

孝聖憲皇后升祔

太廟恩詔仰蒙

皇帝推恩及

臣

下之先得循例具摺恭請

誥命馳贈我曾

祖考明故孝廉雍頌府君爲通奉大夫曾祖妣

清故節孝譚氏爲夫人蠲吉焚黃維靈祇受松楸南望曷罄



哀思謹告

孫男載仰賴祖德備官于朝恭遇

聖母崇慶慈宣康惠敦和裕壽純禧恭懿安祺

皇太后八旬萬壽覃恩得 誥命晉贈我祖考通奉大夫祖

妣氏皆夫人甲午午典江西試請假過家焚黃賁墓茲恭遇

孝聖憲皇后升祔

太廟覃恩復得 誥命晉贈我祖考大夫祖妣氏皆夫人如

前階騰黃以達維靈祇膺謹告

男載歲甲午典試江西乞假省墓敬以恭遇

聖母崇慶慈宣康惠敦和裕壽純禧恭懿安祺

皇太后八旬萬壽覃恩所得晉贈我考通奉大夫妣夫人生

妣夫人 誥命焚黃茲恭遇

告

孝聖憲皇后升祔

太廟覃恩復得 誥命晉贈我考葯房大夫為通奉大夫妣

朱氏夫人為夫人生妣陸氏夫人為夫人且蒙 賜贈曾祖

考通奉大夫曾祖妣夫人晉 贈祖考通奉大夫祖妣氏皆

夫人實惟慶積二人是以榮膺三代騰黃遣祭維靈祇承謹

告

祠堂告文

乾隆四十五年恭遇

皇上七旬萬壽錫福推恩臣下得追榮其先載以祖父母父

母遺德之庇祐正月奉

命祭告于秦蜀四月回道沔縣聞

命補授禮部左侍郎於是我祖考又鶴府君晉贈資政大夫



祖妣陸氏吳氏全氏皆晉贈夫人我考葯房府君晉贈資政大夫妣朱氏晉贈夫人生妣陸氏晉贈夫人四被

天恩幽光發耀癸卯載以衰邁

恩予原品休致十一月歸里茲者涓吉設享祇奉 誥詞騰

黃焚達伏惟先靈默鑒

休命歆承神主改題永斯妥侑自今庇祐感慕何涯謹告

與城楊家橋祖墓焚黃文

孫載昭告於祖考祖妣之靈曰乾隆四十五年庚子恭遇

皇上七旬萬壽元日

詔書覃恩得晉贈錢榘初資政大夫禮部侍郎錫之 誥命

晉贈陸氏吳氏全氏皆夫人春敷

慶典秩加臣下之先衰賁潛光四受 綸音之及癸卯載以

年衰蒙

聖主深恩予原品休致還鄉上冢孫男之報無復後期祇奉

制書焚黃以達我祖考又鶴府君我祖妣陸氏吳氏全氏

榮命踧承幽靈歆鑒伏念世澤非艱難一日諸孫有飢凍多

人泉壤仰渥疊膺本根俯慳相保儼憑我祖祈祐將來誠知

責在孫身所不忘於日暮振興惟力銜感以哀尚饗

洲航山墓焚黃文

男載昭告於考妣之靈曰乾隆四十五年恭遇

皇上七旬萬壽覃恩晉贈錢炆為資政大夫禮部侍郎錫之

誥命晉贈朱氏陸氏皆為夫人

慶典崇加 綸音切被今男以衰邁蒙

聖主深恩予原品休致祇奉 制詞焚黃以達我考葯房府



君我妣朱氏生妣陸氏

休命四膺恩靈同鑒惟我庶母丁氏碩人弟姪為儒贈馳有

日長歆耐祀奕禩光榮男載年衰難以供職幸歸田里瞻省

封塋皆賴

君恩得紓親念今山上下數千株蔭木實惟四十年守墓郁  
老之所培近澗東南九畝許祭田猶是一兩家先世墳鄰之  
所種靈兮陟降湖曰永安嗚呼歿存具感矢報何涯翹首慕  
思薦芬摧咽尚饗

張夫人墓焚黃文

乾隆四十五年恭遇

皇上七旬萬壽錫福萬萬元日

恩詔德徧羣生歆幽褒顯是月

聖駕啟鑾南巡江浙載

奉使祭告於秦蜀五月四日回道泗

縣聞

命補授禮部侍郎於是實仰膺三代資政大夫夫人之誥

命爾張氏以七月十二日病卒於京邸前封夫人茲晉封夫

人癸卯二月載以衰邁蒙

恩予原品休致歸里卜以十二月十五日子時葬夫人於嘉

興縣九曲裏之原誕揚

休命祇奉

制詞尚克歆承焚黃以告

祭張侍講文

嗚呼天道易知惟善人則昌後天道難知或善人而不壽先  
生之行己本末既信於家而信於朝孝友誠敬抑然沖然眾



見其風標今先生歿矣墓銘疇作可不媿乎其昆弟子姓戚  
鄙故舊暨其同僚冢君名成辛未是年分校南宮蓋自太傅  
文端公少宗伯公及身及子以進士入翰林蟬聯四世矣人  
咸謂非先生之德又焉能集慶以居豐然則造物者其果不  
茫昧邪何高梧之棲鳳摧老榦於秋風某等幸出門牆後先  
侍側疇昔非遙追念顏色維

天子深鑒其學問

特嘉其正直將大用之可卜忽云亾矣曷極月之二日館課  
諸生先生聿來指於東榮命賦廣寒賦猶未成何蟾兔之乍  
缺兮獨沈寥而上征上丁陪祀  
釋奠辟廡松陰翔步諸生亦從昨朝侍直待漏益恭何歸第  
而伏枕兮甫及旬以告凶嗚呼壽止中年醫慳大藥豈滋爲

善之懼實鮮人閒之樂千秋何如空傳著作雖華構其有承  
兮歷薛庭而淚落笑言已矣客座依然先生安歸歸于龍眠  
詎秋風之悲一唳兮乃輟奠乎總帳之前哀哉尙饗

祭劉繩庵相國文

同通政申公甫時  
尙未賜諡

嗚呼宏詞之科公爲舉首屬在同徵載先甫後回憶丙辰之

冬載則同試保和殿中于今三十八年庚午之春公直軍

機甫則奉教相依于今二十四年回憶先後同徵二百六十

七人今甫兩人白頭哭公其能不愴然其能不愴然嗚呼公

之以清德作相惟我

聖主恩遇實鑒知今者榮哀備矣而身後鴻筆之傳公自有  
之況賢子孫之克承在于公則復何悲嗚呼甲申之夏錫壽  
之堂同徵六人以詠以觴維陳楊暨王歷歲云亾今公箕尾



又乘白雲以徜徉秋雨蕭涼毘陵蒼茫踽踽兩人盡平生於斯章嗚呼尚饗

初祀永豐鄉田神蠶神水仙神文

永豐之鄉男耕婦桑維神福之以豐以康毋曰一方我社我蜡我

皇國之慶春賽秋報兮田祖洋洋田穀昌昌時憲攸謹大姑二姑三姑把蠶兮豈惟古曰馬頭孃蒼蒼兮平林汪汪兮曲塘田蠶兮歲穰維神靈兮惠斯疆永豐鄉水泱泱神之來兮汎漁航西湖廟祀水仙王今茲作社昉在杭我漁之利兮撒網鳴榔維神臨之兮風雨徜徉如所如兮水一方賣魚得錢兮野飯香拜神之休兮山遠溪長

瘳石齋文集卷第二十五

終

瘳石齋文集卷第二十六

萬松居士詞

南鄉子

雨歇禽鳴竹梧疎處假山青賸有寂寥人獨對紅翠點點秋花風影碎

埽花游

丁巳春三北裝初卸留止梧桐鄉於綠陰時誦王中仙舊盟誤了又新枝嫩子總隨春老之句輒爲和之

甚春不住驀酒散西園亂蛙深草倦游未了付煙侵郭冷雨遮江渺可是重來比得司勳暗惱步清曉柰桐露自流紛惹



衫帽 苔院何忍埽況只作天看更無人到簾沈夢悄謾萋  
迷鬢影鏡中年少紫陌鞭遲尙想朱門閉早漏斜照正雙槐  
乳鴉聲遶

蘭陵王

戊午十月三日偶擬西洲曲意成此闕

伯勞寂烏日門前覆碧西洲晚曾是幾番折取梅枝寄江北  
鴉雛悵鬢色粧飾單衫帶力郎何在搖槳弄花還趁南塘路  
無隙 低頭試尋覓漫損盡蓮心留下蓮葯分明憐得難憐  
得況錦袖波冷玉鈿香悄凝眸千里至雁翻但長斷書尺  
消息歲虛擲儘海動樓陰天垂簾額闌干素手凭將夕儻爲  
我愁繫待君愁釋西洲風好遣夢裏暫認識

清波引

庚午深秋憶采菱用石帚韻

竹繩區浦記瀟照掠沙燕舞唱歌心許晚荷映眉嫵動水撥  
青葉淺坐瓷缸划去沉安橫板船腰共郎壓兩頭處 盈籃  
摘與趁秋熟還又幾度芡盤連否觸莖謾相語鄉煙渺難隔  
夢徧城南疎雨恰似尖角磨圓酒闌吟苦

探春慢

丙子臘月廿四日聞季弟星病卒于家而家書未  
至未知其卒日除夕孤坐不能長歌聊以當哭亦  
自哀也

鐙漫銷煙研還凍墨三更悽斷今夜別憶冬初書傳秋晚纔  
隔經春過夏誰遣連年病竟摧折寒風先化半生酸苦相同  
舊家零落無藉 回首堂前幼小已萬恨蹉跎清淚空瀉寫



婦聲長孤兒影隻忍使汝魂悲咤埋得荒江骨算未了何時  
休罷五十明朝顛霜如許飄乍

齊天樂

戊寅初冬客以豆棚閒話圖屬題遂成此辭

展來瞥見吳天景誇他野人籬落竹翠撐高繩黃攪亂紫白  
豆花都著陰濃似幕慣蒲扇風搖暑村酬酢老矣鄉心何時  
拚忘少時樂田翁短帚跂腳學堂初放去涼動弦索葉罽  
星疎枝丫露重猜謎中間歡噓明朝又作任里嫗鄰娃坐聽  
聲各滿冊秋容幾曾能畫卻

木蘭花慢

癸未冬日

對紅鐙自剪紙窗薄布簾疎柰月正流天風將釀雪寒已徐

徐巖居照梅護篠甚三更憶到五更初烏几還親蠹簡鑿坡  
方負僂裾躊躇蝶夢漫遽宿昔未應虛只愁來有路重  
番結轆沒箇分疏何如泥人病酒任蕭蕭短髮不勝梳坐聽  
飛鴻過也合教寄與誰書

一枝春

心齋侍御有綠意題筍之作亦成此咏甲申秋日

是竹初生燕來時慣溼驚雷宵雨貓頭迸處最好引鞭深土  
村娃喚廟也須避棟風薈露還只怕竄過東家卻近薛階無  
數成旬未成休誤憶連泥脫殼僧樓同煮參回玉版半似  
鬪茶佳趣蠶蟻更穩甚多忌小名親付看幾日繡祿於菟夢  
占定許

埤雅旬內爲筍旬外爲竹禾俗蠶時忌筍音同損呼筍爲蘿蔔贊甯  
筍譜引占夢書夢竹生筍者欲有子息也侍御望得子切藉以祝之

玲瓏玉



乙酉初春張給事編修兄弟治具酌諸君酒闌戴  
儀部指几上盆梅同賦之

丁戊清齋乍忘了第幾花風今春閏仲暎寒幸莫怱怱況過  
橫街曲屋已杯光磨綠簾影篩紅蓼蓼憑譙樓更轉一通  
坐近疎枝矮本憶船來江外村在山中遠驛輕郵底相關費  
汝尋儂趨踏金鑾華組儘孤負籬芟老竹徑補新松且拚醉  
看庭心煙月未濃

渡江雲

二月二十二日雪匏齋儀部招同心齋西壩兩侍  
御蒞鄉編修飲各賦一闕

雪晴晴更雪簾鉤曉挂嘉釀憶江村柳煙飄小院可便相攬  
杏雨又梨雲春今遇閏再幾朝纔是春分憑好語吳船新到

開甕待諸君 殷勤帽檐低拂屐齒輕扶笑閒坊鄰近鐙事  
後常依屏曲屢漬衫痕寒禁料峭高齋靜且伴他明白黃昏  
應只誤南園撲蝶羅帶

石州慢

過張給諫編修兄弟偕尋紀侍御秦侍御遂游陶  
然亭歸飲秦侍御齋與紀侍御棋罷賦

雪霽收寒風午釀春天曠延矚行人影成三夾巷叩扉聲  
續林枯水淺但借高閣危闌西山早向城頭簇芳草豈無心  
只今朝難綠 催促聊排酒具莫待廚爨更攜簫曲鴉暝俱  
還卻醉少游吟屋鬢絲因甚枉被一穗鐙花年來暗笑翁眞  
秃猶是未能拋賭輸贏殘局

春從天上來



題李給諫恆齋巡視臺灣賞番圖

帆過澎湖指靖海當年收取方隅使轅山靜番社風舒  
九重萬里春敷徧龜窟龍岸向玉節羅拜恩濡語伊嚶儘人  
皆齒黑男盡須無 相看竹圈垂耳沉雞羽釵長蛤網花疎  
白酒烏羊稠餉細布 一般有淡巴菰坐榕陰成幄材官立鏡  
吹嗚嗚寫橫圖況新詩百韻傳唱 皇都康熙癸亥命提督施琅取臺灣鄭克塽降封靖海將軍靖海侯臺灣為土番部族龜窟龍岸俱番社各其俗惡老男子頭白不留一須幼即鑽耳實以竹圈更壯漸大如盤女子頭插雞羽各莫良言齊整也又簪野花繞頭日蛤網賞番以羊酒煙糖布縷之屬俱見給諫百韻詩注

踏青游

清明日答匏齋儀部

酒病憎寒東鄰昨傳詞句還說道芳郊煙縷雜花香新草色  
近鞦韆處可準備相挨好春時節莫忘少年情緒 一枕敲

眠高城曉鴉無語卻送得空庭細雨更簾陰兼雪點乍飛仍  
住悶怎遣憑君向天商略甚欲踏青難去

曲游春

午霽匏齋儀部仍邀過法源寺歸飲其邸同心齋  
侍御厚石舍人

雨後春生噤強將車停騎支徑催踏不出城南縱平蕪未展  
細塵都壓靜院松陰夾又那必早鶯噓恰問海棠盛否今年  
料理借儂禪榻 此際人家歡洽定滿沃香餉鮮塗雕鴨歸  
醉非遲但頻教貰酒何煩攜榼老賺澆愁法還幾見柳枝檐  
插敢道短拍新腔夜吟已怯

齊天樂

送諸桐嶼編修出守辰州



君南我北分秋賦蓬瀛比年呼伴讀書徵題論書收帖閏月  
剛催春殘新恩

帝眷恰行在綸宣虎符教縮杏白錫香送人官柳正如綫  
城頭山翠二西遶辰溪一曲雲映涼繖民物清時功名壯  
歲此去相期何限連朝更款趁花外林亭雨餘歌管莫寄丹  
砂醉顏還自暝

玲瓏玉

查榕巢太守招集接葉亭賞丁香花

去歲闌干爲銷黯坐盡黃昏懸鏡更醉樹如雙鬢添紛驟暝  
春衣乍換太濃香蓄露碎影搖雲清尊知心心絲緒怎分  
直是丁甯白夢莫絲來黏亂絮欲攙勻紫棟前頭替東風佇  
苦停辛從教金簪人戴顛相笑行遲展點立靜簾紋也應道

護惺惚明月閉門

又

接葉亭賞丁香花歸余既率填一闕明日榕巢送  
韻乃是分得庚字重賦以應

絳蠟吟殘曉簾卷蝶夢猶清緘來字小兩名半合先庚倚石  
臨檐那寫是霞舒葉襯雪綴枝擎丁星回柔腸天際又晴  
澹覆雲陰最好但斜收雨色緩約風聲樹在君家算蠻牋我  
亦多情深杯常偕游侶呪花更飄飄掠帽旖旎圍亭只除欠  
付紅牙唬箇嫩鶯

燕山亭

法源寺牡丹

水際林閒鄉景夢遙未易門敲塵海深占眾香靚擁新陰稽



首佛憐花在幸數春餘謾輕道冬嚴會耐幽態讓暎窖烘將  
試鐙先賣 叮囑今夜風姨候月姊停輪小心廊外松院露  
霏蘇砌雲鋪多關釋迦天界半坼紅苞須供養也知低拜根  
蒂誰不省韶華已太

菩薩蠻

丙戌消寒第一會

芄野給諫齋咏玻瓈鐙  
殢人又數梅花九尊前明月梁閒有蠟燭盡心能未嫌遮一  
層 冰兒休比薄也儘絲兒絡裏熱外邊寒教君徹骨看

逍遙樂

消寒第二會

松坪編修齋咏香櫟  
清供尚延秋令縹顆堆盤消受韻疎香靜釀雪銅街矮几深  
廳且伴無言烹茗江村幽興記人家挂旭皴膚翦霜連梗道

橘小橙酸風味差勝

歸思年年難準夢來番番未定僧樓

舊凭處閒鎖了翠筠徑

團團暫相見按手霧霏金冷還如帕

羅輕裏阜蘭親贈

余家郡城而先宅在半灘去塘之西有水寺園竹萬竿梧楸開  
香櫟十數株童時嘗初冬候送老僧錢攀摘落盈籃今樹亦

物化  
久矣

水龍吟

消寒第三會

晴溪學使宅題吳仲圭竹譜不全卷

最憐橫卷多姿梅花可種庵無主湖州畫好眉山文在總牽

幽趣綃展梢長墨披葉澹分明家數悵煙曉露壓湘江一曲

如夢斷知何處

猶是蕭蕭不住任寒颼擁來窗戶銜杯自

晒水流花謝半教塵土寶劍雌雄神龍首尾誰當千古謾今

宵爲爾重開又闔牘相思句



華胥引

消寒第四會諸公過飲小齋咏糟蟹

無腸公子舖歡先余醉鄉謾入躁過將糖醯雜饗裏還自得  
小院微霰催寒正沫收膏溢憑侑深盃夜分鐙下初擘方  
法誰語要茱萸曆中盈粒門生休議尚輸何家鮓腊菊後依  
稀香在憶斷橫霜溼沈酒難勝被伊忘了愁寂

釵頭鳳

消寒第五會渭厓侍御齋卽席同賦

交相善來相伴畏寒非獨儂耽嬾城微雪簾斜月絳鐙筵做  
采盧盤列喝喝頻相勸深相眷算應梅樹如人健千絲  
髮三蕉葉還羸狂笑未輸愁怯罰罰罰

行香子

消寒第六會心齋侍御齋咏紙鐙

針刺五色紙成秋紗紋  
中涵書畫湖州南潯鎮

人善  
製此

簾影橫斜屏影交加懸鐙轉樣出新花慣須剪蠟了不塗鴉  
道繡鍼織香箋薄女工佳撩人心眼玲瓏千孔是秋紗不  
是秋紗江鄉堪憶都市纔誇莫風來破雪來溼霧來遮

卜筮子

消寒第七會華陽侍御齋題沈啟南山水卷

柳碧見江南村遠知春處老友匏庵蹟竝留還續停雲句  
相照壁釭寒坐聽城鴉曙如此溪山合讓誰寂歷殘年度

一萼紅

丁亥冬日出西華門馬上望晴雪賦

鳳城深又瑤花晚霽敲鐙過橋心天襯樓臺冰明島嶼凝望



都赴幽襟待帘底驕裘換酒怎便有江外玉梅簪畫舫西湖  
籃輿鄧尉此際招尋 螭右十年恩戀近鑪煙扇影綠鬢絲  
侵官樣文章俊流翰墨猶柰孤負於今幾回夢鷗雙鷺隻儘  
荒了漁汊荻梢沈莫道西山笑人旋釀春陰

綺羅香

戊戌閏月在澄懷園得松坪編修揚州書惠示近  
詞數闕振觸舊游賦此答之兼簡秋芷前輩對琴  
秋曹西壩觀察春農舍人

小簾流雲深園落照夢覺殘荷香靜不道心驚天外短書遙  
贈三尺雨春老鵲唳二分月酒闌人影悵江城髡柳無枝維  
摩花散見禪定 橫街鐙火在眼同榜酣嬉撚指孤尋難更  
鬢雪須霜久付畫蛾青鏡憑幾日淮口歸帆趁諸家蜀岡吟

鐙只闌干蟋蟀今宵露零愁思冷

鶯囀序

應 皇十一子教畫四時花卷并題此闕

年芳任伊刺促奈心長髮短隴頭別誰與探花不記何處人  
面溶溶月海棠開後辛夷塢疊蒼苔片怎銷凝姚魏家家信  
風吹棟 一夢前游買醉便醉甚鶯梭燕翦蕙香謝紅藥橋  
邊忘憂應是無館北山南看春轎去裏湖外送春船轉并餘  
年拋撇蓮娃夜涼秋岸 披煙蓼嶼壓露豆棚謾舊園在眼  
過絡角正飛烏鵲一水盈盈不動厭厭碧霄非遠同心可贈  
珠江江上雙鬢都戴花田雪趁來逢只合殷勤慣了當玉杵  
分明絕勝餐英子落況又如霰 輕衣成削幾許冬心向曲  
闌自暝儘點綴山茶天竹勝了黃梅煞尾圖催全身筆倩蓬



萊咫尺成連琴罷翩然羅襪微步負笑相招奚事紅塵嬾從  
容稽首東皇歲歲春多倍教眷戀

又

應 質郡王教既畫墨花四時卷閱歲已亥首春  
復屬題此闕

沈思流年暗換但花開到處問何事花裏春來卻又花裏春  
去醮醮了碧桐初引山籬颯沓吹荒雨儘中間葵扇蕉衫帶  
人銷暑 不斷深情院本好手賺脂含粉吐幾梢墨學得文  
蘇宣和應也收譜水仙姝吳興清致野梅老會稽真趣笑難  
工橫卷催成略添殘句 雙隄淥照萬樹紅霏算舊時樽俎  
弱柳外畫船撐幔影過西泠香入南屏酒闌無據回腸是九  
纏頭非一天涯芳草休歌者欠低回總著湖邊樹霜絲兩鬢

疎疎怕見青銅未識樹定在否 今朝還記隔歲重看要慢  
詞寫取怎敢道西園閒雅賞及溪藤馬後攜持尊前伴侶東  
風正起攢鬚分瓣蜂銜鶯啄蝴蝶鬧掩重門多把金鈴護恩  
忙韋曲家家惱徹更番禁煙百五







蘇石齋

